


NTOLOMPITA IPANA MVUMINO

YABULA KUYUKANYIKWA

 Nakusachila bingi, Mulongo Demos. Kejishuko ja kutanwa kuno mu mbung'eno ya Bwinakilishitu bufuku buno, mu kino kyaalo kyamashika. Kabiji Natuminde kunzubo, kimye kicheche kyapitapo, ako kwakaba pepi nobe madigili tweti, akwa ku Kabeta kabuyeke, kukila byo kuji kuno. Nafwaijilwe kwiya nakyo kuno. Nsakupelawizhako ne kubwela jibiji, bukiji bukiji. Byonse bijimwa bibena kuma na mashika. Mwalangulukapoka pa kyokyo, Creech? Ke... [Aye mulongo waamba mba, "Kwatalala."—Waku.] Kine byokiji.

² Kabiji njibingi na lusekelo pa kusambakana na yuwe kafunga wawama, bufuku buno, kabiji ne pakumona anweba bantu. Ponafikatu mukachi, mu bimye bicheche byapitapo. Nafumina ku Tucson, ako Nkonajikuya leelo. Naendeshe kuyako bufuku bwapita, kabiji nafikile pepi nobe tuu-sate lukeelo luno, monka mu Tucson. Kabiji najinga konka juba jonse, konka kwa. Kabiji nafumineko mamineti acheche... Kyawama, Amiwa nafikile, kyaikala pepi nobe awala-na-afu, Naketekela, kintu kiji byonkabya, konka kuno. Kabiji nanchi Amiwa kechi nalala kimye kyabaya ne. Bino Amiwa kechi nsakweseka kulala kuno ne. Bino atweba—atweba tunji nalusekelo pa kwikala kuno.

³ Awe nsongwalume mucheche, ubena kukaisha aao mamaikolofoni kuno. Najikwikala kunyuma kokwa, pa... kimo kipona baana babacheche. Nsongwalume mucheche wajikwiya, watala pe amiwa na bwenyi. Naambile mba, "Atweba bonse banyike twakonsha kwikala pamo, kechi twakonsha nenyi?" Pano, Amiwa kine nebatemwa balunda babacheche, nangwa byonkabyo.

⁴ Kabiji kiji, oo, ke kintu kyawama bingi kwikala kuno bufuku buno, kabiji ne kwikala na jije jibumba ja bantu bawama baimana. Kabiji Amiwa naketelela mba Mulongo Williams wimubuulapa kikye, kabiji ne Mulongo Rose kuno, na mambo ambung'eno ikatampe ibena kwiya. Naketekela mba anweba mwikiyuka bingi bulongo. Kwikala ku Ramada, ponkapotu, mbung'eno ya Banabalume Basulu. Kabiji twaketekela kwikala na kimye kyawama bingi kokwa. Mulongo Velmer Gardner, wawama ng'ambi winshita; ne bakwabo bamwingilo, Orala Roberts ne bavula, bakekala konka. Kabiji twaketekela kwikala na kimye kyawama bingi mwi Nkambo.

⁵ Naketekela, bimye bimo bya bibye, lekai tukekale na mpwijilo ya lubuko mu yoya mpuzha. Uu-uu. Nakonsha

kutemwa kusenda Mulongo Oral, kabiji ne kwikala pamo. Ee, mwane. Bushe akyo kechi kyakonsha kwikalatu bulongo nenyi? Akyo kyakonsha kwikala ke—ke kintu kyawama-bingi, kechi ibyo nenyi? Ke mpwijilo ya lubuko, monka mu Ramada, akyo kyakonsha kwikalatu bulongo. Atweba . . . Nanchi twakonsha kuuba kyokyo, mwayukatu. Aye Nkambo wafwainwa kwitumwena atweba, twaikala na mpwijilo ya lubuko. Nanchi atweba tukooba . . . Tukazhokolokanga pano, kufuma ku kipwilo kimo ne kuya ku kipwilo kikwabo, na kweseka kukumbanya mambo awama, kabiji ne kukwatakana umo na mukwabo, ne kwikala na lumvwang'ano lwa bupopweshi mu bipwilo byonse byapusanapusanana. Abyo byo twaketekelamo, mba twi umo, mwi Kilishitu.

⁶ Naambilenga juba jikwabo ku dokotala. Amiwa mbeni kwingegeza kuya kubushiya bwatulunga, kabiji wafwainwa kupeswapeswa mu mubiji. Nanchi Monajinga na kupeswapeswa. Kabiji wambikile pa kimo kipima byenda mishipeshipe . . . Na . . . Kechi mungipuzhe na byokiji ne. Kabiji wataine kintu kimo kyeenyi. Kabiji wabwelele wakakalwa musango mo kyaikela, kabiji wakebele kinje kya madokotala, kabiji kechi wakwatakenye kyokya ne. Aye waambile mba, “Amiwa kechi namonapo kala kyokyo ne.” Kabiji nanchi aye wamwesheshe kipikicha kya kikyeye, byo kikala na kapingu ka muntu, kabiji uji na kapingu wa bubiji, kabiji byaikala byapusenamo kimo ku kikwabo. Bino aye wamwene pe amiwa byonse bibiji bijitu pamo. Waambile mba, “Obewa wi muntu wapusanako bingi.”

Naambile mba, “Amiwa kimye kyonse nayuka kyokyo. Muntu yense uba.”

⁷ Waambile mba, “Atweba kechi twakimonapo kyokyo ne.” Nanchi aye watatwile kumbulakyo.

⁸ Naambile mba, “Kyawama,” Naambile mba, “mwayukatu, Naketekela mba Nkambo wawama, umvwe Aye witulenga, Witulengatu kwikala bapusanako pachechetu. Atweba kechi twipasha umo ne mukwabo ne, kabiji nanchi kimye kimo kechi tuuba byubilo biji nobe bya mukwabo ne. Bino—bino Aye wikilenga kwi Aye . . . Jishinda Janji mwine ja kwikilengelamo. Tutwelatu mu mashinyi akatampe abumba, kabiji tukekalatu bazhindama, Aye uketubumba mujishinda Aye jo akebelamo atweba mba twikelemo.”

⁹ Kabiji Na—Nayuka kafwako nangwa umo wakonsha kukeba kwikala kintu kiji kyonse ne kanatu byonka byo uji. Kintutu kimo kyo twakonsha kukabila . . . Panyuma ya kupuluka ne kwikala baana ba kwa Lesa, kintutu kyo tukeba ke kwenda kipikipi pajuba pajuba. Akyo kyotukeba, alwa lumvwang'ano lwabupopweshi lukatampe. Byo kyaikala kyawama! Bushe mwakimanapo na kulanguluka byo twafwainwa kuuba inge kechi twajinga na kyokyo ne? Kika—kika . . . Inge alwa

luketekelo lukatampe kechi lwakonsha kukokoloka mwi atweba ne, twakonsha kuuba byepi?

¹⁰ Amiwa naambilenga, mu kipwilo kimo mba, lekai Ami... Patanshi, kifulo kimo, apa mino ke kikwabo, kabiji mwaya kyaalo Ng'amba ng'ambilo kimye kimo, Nalanguluka nafwainwa kwikibwezhamo mu kipwilo kimo. Pakuuba Nalupukilenga mu kishimikwa amo mo Naambilenga kyakosa, pa baabo bantu leelo booba aao mazha akatataka o baji nao, be atela mba kuzhobakana, nangwa kintu kimo. Kabiji Naambile mba, "Amiwa kechi nayuka ne, akyo ntanda yonse, bantu bakeba kumokola mikupa yabo kabiji—kabiji ne kuuba muyewa musango."

¹¹ Nanchi, kwajinga mulongo, pepi nobe tweti-sikisi, myaka tweti-sebeni, wakumenye kunyuma, waambile mba, "Pa kakimye kachechetu, Mr. Branham."

Naambile mba, "Ee, mwane?"

Aye waambile mba, "Mwayuka, kechi mukwatakanya ne."

Naambile mba, "Naketekela kechi Nakonsha kuuba ne."

¹² Nanchi aye waambile mba, "Mwamona," aye waambile mba, "Nakonsha kumona po mwaimena." Waambile mba, "Obewa wi muntu wa myaka fifite. Bino inge wajinga mu myaka yami, kyakonsha kwikala kyapusanako."

¹³ Naambile mba, "Pembelaiko mineti umo." Naambile mba, "Nasapwijienga Mamboawama kimye kyo Najinga mwanyike na myaka teeni kukila obewa. Amiwa nakiketelatu onka Mamboawama amo. Nataine kintu kimo kisenda mpuzha, kabiji ne lusekelo lwavula mu kwingijila Nkambo kukila bintu byonse diabola byo akonsha kulenga kuji konse." Ke... Kipana buwame.

¹⁴ Mwayuka, Davida waambile, kimye kimo mba, "Nobe sebula byo omvwa kilaka kya meema a mu kakola, mweo wami umvwa kilaka kufuma kwi Anweba, Anweba Lesa."

¹⁵ Kabiji inge mwakonsha kumona tutwe tubitu tuheche, inge aye—aye bamukozha, kapepo bakabwa bamukwata, ne kuzutulako musunyi wabaya kulubaji lwanji, nangwa kintu kimo. Aye ubena kusuuma mashi. Kabiji, aye, kabwa wakonsha kumulondela. Aye kechi uji pamo nobe muntu ne. Kabiji wakonsha kwipaya awa diyala nangwa ubena kusuuma mashi nangwa ne. Kabiji nanchi jishindatu jimo... Inge awa diyala ubena kusuuma mashi, jishindatu jo akonsha kwikelamo na bumi kanatu wafika kuji meema. Kabiji inge wakonsha kufika kuji meema, aye ukatoma ooa meema. Ukaleka kusuuma mashi, kabiji—kabiji wakonsha kufumako. Aye wajimuka bingi.

¹⁶ Pano anweba mwakonsha kutwelelamo, kumona yuwe wa tutwe tubitu tuheche wakozihiwa ubena kusuuma mashi, kabiji aye usutulatu mutwe wanji peulu, kabiji uji na buyuke

bwakutuluka kwepi kuji meema, kwingijisha moona wanji. Wafwainwatu, kutana meema, nangwa konaika. Kabiji pano kiji pakachi ka bumi ne lufu, kwi aye. Aye, kaji konse—konse—konse kabwema kacheche nkoaji nako, aye weseka, ukebeshatu. Aye wafwainwatu kwiatana.

¹⁷ Pano, abyo byobyoyo twafwainwa kwikala na kilaka kyakwa Lesa. Mwamona? “Byonka sebula byo omvwa kilaka kya meema a mu kakola, mweo wami umvwa kilaka kwi Anweba, Anweba Lesa.” Kufiiwa Nanji kuntu kumo, ke kukabila kwa muchima wami. Kabiji Naketekela mba ayo yo nkebelo ya bonse biji muno bufuku bunu.

¹⁸ Kabiji pano, bufuku pa bufuku, kabiji Natemwa kumona kikye. Bilungi byo mumona pa kifulo kimo, anweba mwi bimona ne pakwabo. Na—Natemwa kyokyo. Anweba mumweshwa lumvwang’ano lobe lwa bupopweshi, kabiji ne kumweshwa kyo twaikela pano.

¹⁹ Kabiji, oo, Nakonsha kutemwa kumona musango-wakala wa kusangululwa mu Phoenix. Oo, ami! Akya kyambo kya *Phoenix* kyumvwanika bingi bulongo kufumatu kimye kitanshi kyo Natangile, pa kikye: Phoenix, Arizona. Wami, nsongwalume mucheche, Nalangulukile mba, “Inge Nakonsha kufika pa kyokya kifulo! Inge Nakonsha kufika kokwa, ku Phoenix!” Kabiji pano pa kwiyimona, ne byo tuji kuno twatana kuuba mba iji mu bubu bwabaya bingi, nobe byonka biji ma mpuzha akwabo, bakang’enda babena kwiya; ne kutoma, kayilo, bubipisho, bintu byonse bijitu patoka.

²⁰ Bino, nangwa byonkabyo, mukachi ka byonse bya, muji buneme bwakishika abo Lesa bo asukanya kufuma mu kiselebwa kuno, abo bubena kusama mu muchinya wa bantu balukumo bakwa Lesa. Kabiji akyo kyo Naishila kuno, bufuku bunu, na kwibika amiwa mwine ne anweba balongo ne anweba banyenga, na kweseka kusamisha Kyeya kya Nkambo Yesu ku bakwabo, amba bafwainwa kutanwa, ne abo, mu kukwe kukana kwabaya bingi. Kabiji bavula ba mubooba kechi bakifumamo ne. Amiwa natondwa na kyokyo. Kukiji bakwabo bavula bafwainwa kwiyamo, kabiji twafwainwa kuuba kiji kyonse pakuuba mba twibatwezhemo, kabiji ne kwikala bumi abo bukamweshwa Kilishitu.

²¹ Pano, kasa tukyangye kutanga kibaba kicheche kya Kinembelo... Najikufika kimye kypwa Nanemba ne byanembwa bicheche, mu kimye kiji pepi nobe mamineti faivi. Kabiji kipamo kya kafulumende kitala pa musoko batumijile masawakya, Nanchi nafwaijilwe kwiya ponkapotu, kabiji kyafwainwa kutumiwa pa posita, Nalanguluka mba, kapepo leelo, nangwa byonkabyo. Kabiji nanchi Nafwainwa kutwela mu posita ofweshi. Kabiji byo Najikufika, Billy waji kumbuula mba, “Wafwainwa kupelawizhako.” Kabiji nanchi pano. . .

22 Amiwa nazhokolokelengatu, na kuzhokoloka, kuzhokoloka, na booba balunda. Ami, oo, ami! Bamba pa byaoloka pa bibelo bya makochi. Nakumya kana kiji kwepi. Ee. Amiwa kechi nakimonapo kyokya ne. Kabiji bakebelenga amiwa mba mpane musoko pa cheki uji yense wapewa kwi amiwa pa myaka fifite yapita, kulipila makongole a mwingilo wa kipekenyi, ne kubikapo amulekelesha wakubula kulipila, monai, fiili-aduleendi fifiti-faivi sauzande madola.

23 Naambile mba, “Ndozaitu.” Amiwa Nakonsha kuuba byepi kyokyo? Naambile mba, “Amiwa kechi jipo na maseti akila pa maseti fifite-faivi ne.” Naambile mba, “Nakonsha kuuba byepi byobyoy?” Kabiji bakwachijila moona wami ku jiwilo pa myaka faivi.

24 Nanchi, bantu babena kubikamo. Nobe, tuji na kipekenyi, ne—ne bantu, bayukatu jizhina jami mba William Branham, abo balengatu cheki wa byakupota bikebewa. Bamwingilo bengijilapo pa byobyoy. Amiwa kechi natambulapo bupe mu bumi bwami ne. Kabiji nanchi batambula . . . Amiwa ntambula—malipilo kufuma ku kipwilo kyami, madola aduleendi pa mulungu umo.

25 Kabiji abwe bupe . . . Buji bonse, monai, babika mowa mu . . . Kabiji lukeelo lwalondelapo, awa—awa—awa—awa wajinga mukulumpe wa kinje kya bya bumali, waiyanga ne kwamba mba, “Mulongo Branham, wafwainwa kufwachika ao machekei.” Kabiji, kika, Amiwa nafwachikangatu. Aye wibibika mukachi. Kabiji nanchi bapitulukile mu byonse bya, kabiji kafwako nangwa seti umo walipijilwe pe amiwa ne. Bino inge Nafwachika cheki, abo baambilenga mba wajinga wami. Bantu bapana kwi amiwa, ne amiwa Napana ku kipwilo. Oo, ami!

26 Naumvwine bingi bibi, pantashi, nanchi Naishile kutana mba muntu yense uji mu Baibolo, Naketekela, awo wajinga mu ofweshi wa bumupashi wakwa Lesa, wajinga wanungakana na mwine kafulumende. Mpalanguzhai lunyuma musakwikitana. Abo ibyo. Mosesa, Danyela, Yoano Mubatishi. Yesu Kilishitu wafwijile ku maboko a mwinen kafulumende, mu kumanyikwa kukatampe. Petelo, Yakoba, Yoano, Yoano walumwekesho, bonse, baji . . . Bonse bamanyikilwe.

27 Kika? Ke kipona kya Satana. Mwikiyuka kyonyi? Bushe mwayuka mba, Satana wasendele Yesu kabiji Wamumwesheshe bufumu bonse, ntanda yonse, mu kimye kicheche? Kabiji aye waambile mba, “Bonse bwami. Amiwa nguba nabyo monse Mokebela. Mwamona? Kabiji Amiwa nkebupana kwi obewa inge Wakonsha kuponena panshi ne nkumpopwela.” Pano mwamona kuji lubaji lwabyoy?Twashikwa kulangulaka kyokyo pa byetu atweba, bino byo kiji.

28 Nanchi Aye waambile mba, Yesu waambile mba, “Fumako obewa, Satana.” Aye wayukile mba Ukekala nswanyi kwi

abyo, mu Myaka kiumbi kimo. Aye wayukile mba bukekala Bwanji kimye. . . Kimye, inge bibye byaalo byatangijilwa na Lesa, Myaka kiumbi kimo ikafike. Bino kukekala kimye.

²⁹ Baji ne ba UN kabiji ne Kukwatakana kwa Byaalo byonse, ne bintu byonse, mukweseka kuleta mutende. Bino kikulutu Satana uji peulu yakyo, ne mapolitikisi, kika kikamweka? Bakalwa kine monka mwaikelako ntanda.

³⁰ Bino kukeya kimye akyo mata onse po akalumbikwa. Kabiji matolopita akavuma, kabiji ne lukeelo lukaleta Peenape, bwakya ne kutoka. Mfumu Wetu ukatola jitanda Janji. Oo! Kukekala kwimba; kukekala kubijika. Kabiji kukekala mbandela imo, kyaalon kimo, ne kwamba mulaka umo, Wamwiulu. Amena. Amiwa nkabila kyokya kimye. Kabiji Amiwa mbeni kukanamina akyo kikokwanyu, na kuketela mwi Lesa, juba jimo byo kikapwa, Nakonsha kwamba mba. . . Nakonsha kumumvwa Aye kwamba kwi amiwa mba, “Iya kuno.”

³¹ Amiwa nji muno mu Phoenix bufuku buno mu Jizhina ja Nkambo. Amiwa nakonsha—kechi nakonsha kweseka kulondolola byo kyaubiwa ne. Anweba bavula bantu musenda matepu, mumone mba mwatambula, *Ng’anyi Kimye Kino, Mwane?* Akyo kyajinga Amiwa kasa kyangye kufuma pa nzubo ne. Kimwesho kyo kyatumine kuno; ke, Amiwa kechi nayuka ne. . . Amiwa kechi. . . Amiwa kechi ne upotesha ma tepu ne, kabiji kechi Ndanguluka pa byo byo bintu ne. Twiatambula, kabiji tuji na busulu bwa matepu mwaya ntanda. Amwa mwalepa mumasaka ne konse konse, baji na tubitu tuheche nto babika mumatwi, banji na, kabiji bakonsha kubika pa tepu, kabiji baimana byo bya ne kututulula mu mulaka. Kabiji byaya kuzhokoloka ntanda yonse.

³² Kabiji, bino umo ye Najinga nanji, amba *Ng’anyi Kimye Kino, Mwane?* Nangwa, *Akye Kyo Kimye, Mwane?* Amo. . . Ami. . . Pakibelushi bufuku, milungu isatu yapita, pa kipwilo. Panyuma ya bumi bwami bonse bwa kumona bimwesho, Amiwa kechi nakikalapo na kintu kiji byo bya ne, mu bumi bwami. Kabiji kechi Nayuka byokiji ne. Amiwa nji kuno, bino Aye wantumine kuno. Amiwa kechi nayuka byo kyalumbulula ne. Ami jitu. . . Amiwa jitu kuno.

³³ Kabiji Nafwainwa kwikala wabukishika kabiji wakishika, kabiji ajo jojoka jishinda ja kuya palepa na Lesa, ke kwikala wakishika. Mambo, bantu bakayuka. Lesa wayuka, kufumatu ku ntendekelo, anweba ne, nangwa muyuke nangwa ine. Kabiji bantu bakayuka. Mambo, kimye kimo, kwajinga muntu waesekelenga kwaula. Kabiji Lesa wabuujile. . . Nangwa, ngauzhi wakine wamubujile mba, “Twayai tuvuluke. Kwajinga bangauzhi kunyuma yetu. Aye ngauzhi uyukanyikwatu umwe bungauzhi bwanji bwafikizhiwa.” Nanchi twafwainwa twaikala

banshininwa mba Lesa ye wikyambile, saka tukyangye kwambapo kiji kyonse pakikye ne. Ikalai ba bukishika ne bakishika.

³⁴ Pano twayai tukunyike mitwe yetu pa kakimye kacheche tulombe. Pano twayai tushe byakusakamana byonse, mu mamineti acheche asakulondelapo. Nakumya...Mu jije jatemwikwa jibumba jicheche ja bantu bufuku buno, Nayuka mba kuji bobwa bunoshi bwaikala pano abo Yesu bo akalonda juba jimo, abo bakasanguka kufuma mumushinji.

³⁵ Kabiji mwafwainwa kwikala bantu bamo muno abo babula kushinikisha kana bakekala konka nangwa ne. Obewa wafwainwa kukabila bintu bikwabo. Inge mujipo kya kukabila mu bumi bobo bufuku buno, lekai kiyukanyikwe kwi Lesa, byonka byo ubena kusutula kuboko nkobe, ne kwamba mba, "Lesa, Mwayuka kyo Nalumbulula kino kimye. Kabiji mpeshai. Amiwa—Amiwa nakolwa. Amiwa nakabila lubuko. Amiwa—Amiwa nayatu mungi. Nakeba kubwela ku lumvwang'ano lwa bupopwshi. Na—Nakeba kubwela jibiji. Amiwa na—Amiwa naya mungi. Amiwa mbena kubwela. Nasaka Anweba kukwasha, bufuku buno, kubwela jibiji." Lesa emupeshe.

³⁶ Taata Wamwiulu, pano byo tubena kufwenya kwipi ku jitanda Jenu, kupichila mu jishinda ja Mashi, mambo, Alona watwelele ku—ku kipona kyalusa, aye watolele, patanshi, mashi mu kuboko kwanji, kabiji waile kulutwe, kabiji atweba, konka kulwitabilo bufuku buno, tutambula Mashi a kwa Nkambo Yesu, kabiji ne kuya ku jitanda ja Lesa, nakuchichika, byo twayuka mba tuji na nsambu ya kwiya, kechi mu bololoke bwetu ne, pakuuba Bwanji. Aa Mashi aimenako kutokeshiwa kwetu. Kabiji Nalomba, Taata wa Mwiulu, amba Anweba musakuswisha kukabila kwetu.

³⁷ Patanshi, twaipuzha Anweba mba mwitubile lusa, na kwitulekela mambo a mizhilulwila yetu, byo tubena kwisolola kulubakanya kwetu, kabiji ne bilubo byetu bicheche, ne ubi bwetu bwafyamika, kabiji ne ubi bwetu bwabula kuyukanyikwa. Kabiji twisolola ne atweba nobe bamwingilo, byo tuji bang'anga, ubi bwa bantu. Kyapamo, Nkambo, twaimana. Twatemwa bantu. Tubena kumvwa nobe Mosesa witayile ayemwine pakachi, na kukwachijila bantu, ku bukaji bwa Lesa. Akya kyubilo kyajinga kyabaya, kya bololoke bwa Kilishitu, kimye Kilishitu kyo etaile Ayemwine pakachi, mu kupulusha bantu!

³⁸ Kabiji, Taata, atweba nobe bakalume Banji, na Mupashi Wanji mwi atweba, yense Mwinakilishitu uji muno bufuku buno, ekwachijile ayemwine ku meso akwa ndengamambo: "Lesa, bobilaiko lusa." Twajijila bakolwa ne bakabila, ku ooa maboko awama, amo akota, kabiji bamo banyike, kabiji bakwabo myaka-yapakachi, basutula maboko abo. Anweba mwayuka byonse

pa kyokyo, Nkambo. Twalomba mba Anweba musakukumbula mwaila bya bunoshi Bwenu buji mu lukumo.

³⁹ Lekai kwikale bavula bufuku buno, Nkambo, basakufuma kuno, aba beya, bakolwa, lekai bayenga, bakosa, babukwa. Ke kintutu kimo kyaubiwa, abo kechi bakonsha kwikilondolola ne, bino kasa bayuka mba bajitu bulongo.

⁴⁰ Lekai booba baya mungi bayenga kasa babingishiwa, Nkambo, byo twayuka mba babwela ne kutola Kilishitu ponka po bamushile Aye. Lekai bayenga, kasa bawamisha bintu. Nswishai, Nkambo, amba aba babula kwiya basakutana mutende wawama wakukasuluka, balupulwa mu kipaka, kechi kutwajijila na kukaswa ku bintu bya muntanda ne bya kusakamana bya buno bumi ne, pakuuba bekale bakasuluka mwi Kilishitu. Kiswishai kye, Taata.

⁴¹ Peshai byonse byakukabila pano, kabiji peshai Kyambo Kyenu ne kalume Wenu, kabiji Anweba tukemupa lutakaiko. Mu Jizhina ja Yesu twikipuzha. Amena.

⁴² Pano, inge twakonsha kutanga kibaba kya Kinembelo, nangwa Kinembelo kya kibaba, byonkabyo, Kolinda Mutanshi kyapitala kyabu 14, veeleshi wabu 8, watangwa bibye, mu Kolinda Mutanshi 14:8.

Mambo inge ntolompita yapana mvumino yabula kuyukanyikwa, ng'anyi usakwinengezha kuya ku nkondo?

⁴³ Akye kyakonsha kwikala kibaba kyabaya bingi akyo kyo twakonsha kusapwila milungu ibiji kufuma pa kino kimye, kabiji kechi twakonsha ne kufika kupelo yakyo ne. Pajipo kintu kimo pa Kyambo kyapeshiwa. Anweba kimye kyonse mujitu pa kibaba kimo. Mwakonsha kuksa Baibolo yense pamo. Abo ibyo.

⁴⁴ Juba jimo mulunda wangipwizhe, waambile mba, “Wakonsha kusenda byepi mutwe umotu?”

Naambile mba, “Oo, ami! Wafumyamo kishina kyakitu kimo.”

⁴⁵ Natolele kipupu kicheche kya mabula-asatu kyalala panshi, kabiji ne kisutwile peulu. Awa mwanamulume waikala muno bufuku buno, kufuma ku Tucson. Kabiji twajinga ku Pasadena, California. Kabiji Naambile mba, “Nakonsha kutola kikye kipupu kya mabula-asatu ne kusapwilapo myaka tweti-faivi pa kikye: byo kyaikala kyabumi, buji mukachi kakyo; mabula satu, aikala busatu mu Kimo. Kabiji, oo, oo, kuji bintu byavula bingi byo twakonsha kwambapo pe akyo.”

⁴⁶ Kabiji pano nga Kinembelo? Ke Kyambo kya Lesa, Ke Peenape, Kya—Kyajinga. . . Kechi kiji na mpelo ne, Kitwajijilatu nakuya, nakuya, nakuya, Ke kyetu kyakufyamamo.

⁴⁷ Kabiji pano bufuku buno Nasaka kwamba pa kikye: *Ntolompita Ipana Mvumino Yabula Kuyukanyikwa.*

48 Mu kulanguluka pa kikye, bimye bicheche byapita, byo Najikulangulukanga pa...aa mambo a musoko, Najikulanguluka mba, “Kechi kujipo kintu leelo kyayukanyikwa ne. Bintu byonse byaikala byabula kuyukanyikwa.” Kabiji kintu kyonse kyabula kuyukanyikwa kechi kyakonsheka kuketekelwa ne. Kintu kyonse kyabula kuyukanyikwa kechi kyakonsheka kuketekelwa ne. Obewa fumako kukikye inge kechi kyayukanyikwa ne.

49 Inge muji na mwingilo; kabiji, ao, byotuji na basulu batanwako, kapepo bo bavula ba mwiabo. Inge obewa ubena kuuba busulu abo bwabula kuyukanyikwa, anweba kechi mukabikamo bintu byavula ne, mambo ayo—ayo nsubo kechi yayukanyikwa ne, kabiji kechi mwakonsha kubikamo mali avula a kukomesha busulu ne. Nangwa, inge mwi bawaina, musulu wajimuka, ukapembelela ne kupalanguzha, inge uji na mali akubikamo mu busulu, poso watana kintu kimo kyayukanyika, kintu kyaketekelwa, kintu kimo kyo mwakonsha kuketekelamo. Mambo, obewa kechi ukeba kutaya aa mali acheche o wasunga kufika papo, mambo na oa mali mo wafwainwa kumwena bwikalo boobe, kufuma mu bya busulu—mu bya kumwenamo subo yafuma papo pabikwa mali a busulu. Kika, wafwainwa—kwikala na kintu kimo kyakumwenamo bwikalo.

50 Kabiji ao mali aacheche o wasunga, kechi wafwainwa kwiabika mu pokochi obe ne kwialekela monka ne, mambo bangivi bakonsha kwieba. Mwamona? Kechi, kechi ube kyokyo ne. Inge uji naao, abike mubusulu bumo. Kabiji nanchi wafwainwa kwikala washininwa na kuyukanyikwa kwa busulu boobe. Inge wabula kuuba byobyoy, kika, kechi ubikemo mali, nangwa pachechetu ne.

51 Nanchi, busulu bwafwainwa kuyukanyikwa patu pabula kusukana bufuku buno. Busulu buji bonse, mwailatu kwingila, mu ntanda yonse, bwaikala kwasukakana, mambo ntanda iji mu musango wakisukena. Obewa kechi wakonsha kwiswisha obewa mwine ne. . .

52 “Pano, Amiwa nsakusunga mali *avula- mukananga*, a kushimikapo nzubo yawama, icheche kuntu kumo.” Akyo, ke kintu kyasukena bingi, Amiwa nsakwimubuula byo kiji, mambo kafulumende wakonsha kwiatambula onse, mu bufuku bumo.

53 Oo, bintu bijimo na kukasuluka bya onaika bingi, poso byaikalatu byasukena! Twabikanga luketekelo lwabaya bingi mu kukasuluka kwetu. Kabiji, akyo, Naketekela mba kechi musango wawama wakafulumende ne. Bino, naangwa byonkabyo, kukasuluka kwetu kwaikala kwasukena. Mambo, atweba, kino kuyaalo, bantu betu, tuji na mizhilo, kabiji aye mizhilo mo—mo twaketekela. Bino, nangwa byonkabyo, mukyokyo, mizhilo yetu yasukena, mambo bimye byavula yazhilululwa. Aye mulobe Mr. Roosevelt wa mulubakenye

bingi. Nanchi, monai, wakonsha konaunwa. Kechi mwakonsha kubikamo luketekelo lwabaya ne.

⁵⁴ Bumulwila ntanda, oo, ami, byasukena bonse! Bantu bapachikatu, kabiji bapachika, kabiji bapachika, na mambo a bumulwila ntanda. Kabiji bena kikalakulo bapusenamo, pa kikye, kabiji bantu abo bajinga balunda bawama. Ndamakyalo umo ukeya, nangwa muntu umo ukemana pa bukulumpe bwa ulama mutende, nangwa kintu kimo, kabiji mulunda mukwabo uji kulubaji lukwabo lwa bumulwila ntanda, bakatoola umo ne mukwabo poso bapusenamo pa kyokyo, bumulwila ntanda. Kabiji Amiwa kechi...naketekela kechi Nakonsha kukozha muntu uji yense ne, bino Naketekela mba bintu byonse byabola. Mwamona? Ee, mwane. Pano kika kyakutobokela ne kupachika pa kintu kyabula kuwama nangwa byonkabyo? Abyo ibyo. Kyatama bingi.

⁵⁵ Muntu umo waambile kwi amiwa juba jikwabo, waambile mba, “Obewa—obewa ukavota mu bubwe busaji nyi?”

Naambile mba, “Amiwa navotele.”

Waambile mba, “Oo, mu bubwe busaji?”

⁵⁶ Naambile mba, “Amiwa navotejile Yesu.” Naambile mba, “Amiwa nsakukubuula. Kwajinga bantu babiji ba votejilenga.” Naambile mba, “Lesu wavotejile, kabiji diabola kechi wavotejile ne. Kabiji Amiwa navotejile Lesu, nanchi Amiwa navotele bulongo.” Kyaikelatu mwepi mo wavotela, ne byo ukalupukamo.

⁵⁷ Nanchi, monai, katatakatu, pa kwimumweshu kifulo kimo kicheche, apo potusakuleka. Mu bubwe busaji bwapwa bwandamakyalo, kyajinga kyashinikishiwa mu Chicago ne mu mampuzha apusanapusana, aa mashinyi o baingijishenga kuvota, aa, abikilweko na kipanyi kya Democratic, kyakuuba mba kimye kyonse kyo mwavotejile Mr. Nixon, obewa wavotejile Mr. Kennedy, pa kimye kimo. Nanchi, kechi mujipo na lubaji ne. Kabiji mwikishinikishe!

⁵⁸ Kabiji mwaumvwine *Usopa* bufuku bukwapo, byo babikile bya—bya kupesapesa mwaya kyaalo, kufuma ku Mississippi, kumusela. Mr. Nixon wasendele kwitwa-kwa mavoti, foolo pa umo. Nga muntu wakonsha kukifya byepi? Inge kyajinga ba Mr. Kennedy, inge kyajinga musango umo. Amiwa kechi njipo na lubaji lwa kipanyi kimo ne.

⁵⁹ Kipanyi kyami kiji Mwiulu, kabiji Amiwa nji nabo muno bufuku buno. Atwebu twaikala mu bifulo bya Mwiulu, na kwamba pa Mfumu wetu.

⁶⁰ Bino, mwamona, Amiwa mbena kweseka kwimubula mba, abye bintu bya panopantanda bibena kusukana. Kechi kujipo...kechi wakonsha kubika luketekelo mwi abyo ne. Abyo kechi byayukanyikwa ne. Kabiji kintu kiji kyonse kyabula

kuyukanyikwa, Nafwainwa kufumako kwi akyo. Amiwa kechi natemwa yoya ngubilo ne. Amiwa kechi natemwa kwikala kulubaji ko kyatamina ne. Natemwa kulubaji ko kyawamina, kwikala kulubaji ko kyawamina.

⁶¹ Pano, bumi bwa panzubo bwaikala bwabulwa kuyukanyikwa. Mwayukatu, Namwene kibese kimo pa juba jikwabo, mu mabuku amajashi kuntu kumo, amba kwikana kwa bea America kwabaisha kukila kyaalo kiji kyonse muntanda. Kabiji twafwainwa kwikala kyaalo kya bupopweshi. Ee, kyakonsha kwikala byobyoy, bupopweshi, kijitu bulongo, bino kechi ibo bwaitabilwa bulongo ne. Mwamona? Bumpopweshi ke kya kwivwetatu. Kyakosa kubuulang'ana kotufumya kya kumvwala kyetu. Adama waesekele kulengamo bimo kufuma ku mabula a mukuyu, kabiji kechi kyaingijile ne. Kyaikele kyasukena bingi byo alupukile mba amukumanye Lesa. Nanchi bupopweshi kechi bupana byonse bikebewa ne. Bushe mwalanguluka mba kipimo kya kwikana kwetu, kyakila pa—pa byonse byaalo byashala, kipimom kya kwikana kwetu? Twatana bumbulwa koloka bubena kuyatu palutwe mu manzubo etu.

⁶² Kyajinga kyawaina bingi pa kutana, kuuba mba, paseti mukatampe wampeselo ya kyaalo, kabiji mu... Naketekela kyajinga mu Ohio, ako mpeselo ya Bwinakilishitu ko yaubilwe, kabiji kyaletelenga moyo na mambo ayewa paseti wabaya wa babula kuya ku kipwilo. Kabiji pano, pepi nobe eite paseti wa booba baya ku kipwilo, kechi bayukile kine kintu kyo bayilako ne. Abo kechi bayuka kine kintu kyo bayilako ne ne. Abo bayatu ku kipwilo.

“Kika kyo uyila?”

⁶³ “Kyawama, bamaama betusendele kimye kyo twajinga banyike, kabiji twatwajijilatu na kuya.” Kabiji—kabiji pano, pano, paseti mukwabo wa kyokyo, waambile mba bailakotu, oo, na kukumanya bena kikalakulo ne kwamba pa kakimye kacheche. Mwamona?

⁶⁴ Kika, ke kintu kilenga moyo! Kechi kyakukumya ne bwikalo bwa kumuzhi bwaya, monai, bumi buji bonse bwa pa muzhi bwabula kushikama.

⁶⁵ Mwanamukazhi yense ukasongola mwanamulume, kabiji kechi wayukapo kintu pa yewa mwanamulume ne, wakonsha kumusha buke bwanji. Kabiji mwanamulume yense ukasongola mwanamukazhi, kabiji kechi wayukanyikwa ne, wafwainwa kumusha bunke bwanji. Obewa wafwainwa kulomba, pakikye, poso Lesa wakupa mukumbu. Kabiji kyasambakanya Lesa kafwako muntu nangwa umo wakonsha kwikyabanya ne. Bino atweba—atweba, patanshi, twafwainwa kulomba, pa kyokyo. Ee.

⁶⁶ Bino, atweba twatana kuuba mba twaeseka kwalulula ntanda yonse na mutanchi wakufunda, kabiji kine twalengamo buvu mu kikye, kine pabaishatu. Anweba kechi mwakonsha

kwalulwila ntanda yonse kwi Kilishitu kupichila mu kufunda ne. Kufunda kufumya muntu kwi Lesa, kukila byo kimubwezha kwi Lesa, mambo aye ulanguluka mba wajimuka kabiji ne kuyuka bintu kukila muntu mukwabo ne. Nangwa kufunda kuwame byepi, Kilishitu kechi watuminepo kipwilo Kyanji kufujisha ntanda ne. Aye kechi wibabujilepo, kulenga masukuulu ne. Aye kechi wi bafu-...Oo, awamatu. Aye kechi wibabujilenga mba baye ne kushimika kipatela ne. Akyo kijitu bulongo.

⁶⁷ Pakuuba mwingilo wa Kipwilo ke kusapwila Mamboawama. “Yainga panopantanda ponse, na kusapwila Mamboawama ku kilengwa kyonse.” Mwamona? Pakuuba kyonse kyapusanako na kyokyo, kyasukena, mambo kechi kiji mu muntanchi wa kwa Lesa ne.

⁶⁸ Bumi bwa kyaalo kechi bwayukanyikwa ne. Kyawama, kyaalo kechi kyayukanyikwa ne. Twaikalatu mu kifulo akyo ntanda yonse iji na lubazhibazhi lwa kupungila, kyamweka nobe, byonse bibena kusukana. Kyaalo kyonse, muntu yense, uji na moyo wa mukwabo. Baamba mutende.

⁶⁹ Bajinga, kimye kimo, baambile mba, “Oo, inge twalwa Nkondo Itanshi ya Kyaalo kyonse, amba bonse bansongwalume bafwainwa kuya koka, kabiji akyo kikapwisha mankondo.” Kika, kechi batambwilepo bwishi bwa mata mu mwela ne poso bafika pa bukwabo.

⁷⁰ Kabiji bajinga na Kisaka kya Ntanda yonse, akyo kyafwayijilwe kulama ntanda yonse, kabiji kyakakelwe. Pano baji na UN, kabiji kijitu pamo. Kyakakalwa nakyo. Kafwapo kijipo ne.

⁷¹ Bintu byonse byasukenatu; bumi bwa kyaalo, bumi bwa bumulwilantanda, mashinyi akuvota. Oo, ami! Abo baji... Kintu kyonse kyasukena, bintu byonse.

⁷² Pano Nasaka kwikibwezha pacheche pepi. Mwamona? Bumi bwa kipwilo kwasukena kabiji kechi bwayukanyikwa ne. Pano, abyo Paulo byo aambilengapo. Mwamona? Abyo byo alumbulwile, “Inge ntolopita yavuma mvumino yabula kuyukanyikwa.” Kipwilo bumi kwasukena. Bantu kechi bayuka kyakuba ne. Baya, na kululumba kufuma ku kipwilo kimo ne kuya ku kipwilo kikwabo, na kukeba kuyuka wepi uji bulongo; kufuma ku jishiki ne kuya kumwamba, kweseka kuya na kukeba kiji bulongo kyepi, kwepi kuji lufunjisho lwaitabilwa. Kabiji umo wakonsha kwiya, wakonsha kwikilondolola, monka mwaila kishina kyabo kyalufunjisho lwa kipwilo, amba kyo kiji bulongo. Kabiji pano, kintu kitanshi mwayukatu, batanamo kubula kulumbuluka mu kyokyo, poso baesekatu kipwilo kikwabo, kumona kana lufunjisho lwa kipwilo kyabo luji byepi, lufunjisho. Oo, byonse bye, tutana kuuba mba twimokaula atweba bene pa kyokya kimye, kubibye bintu, ma aduleendi

a mikambizho ya kipwilo yapusanapusana. Bino, kafwako nangwa kimo kyatama pa kyokyo ne. Akyo kyakuuba mba bakonsha kuuba bintu bikwabo, nanchi, abyo byobooba, kabiji kwakonsha kwikalako bintu bimo byawama byo booba, kuntu kumo.

⁷³ Bino, mwamona, kechi wakonsha kubika luketekelo lobe mu kwaamba mba, “Amiwa nalamata ku kabungwe ka bipwilo kya Methodist, kabiji Amiwa—Amiwa jitu bulongo mambo Nalamata konka.” “Amiwa—Amiwa—Amiwa ne walamata ku kipamo kya ba Baptist, kabiji Amiwa jitu bulongo.” Kuuba mwikyuba ne.

⁷⁴ Obewa kechi wakonsha kwikyuba ne inge waamba mba “walamata ku kipamo kya ba Pentekosito kya bipwilo.” Obewa kuuba wauba kyokyo ne. Obewa kechi wakonsha kuuba kyokyo ne, mambo kechi byo kiji ne. Twatana kuuba mba kitashi kipamo kya kabungwe ka Pentekosito, Jenulo Kanso, kyabikilwe mu ndonda, kechi kyataile kimye kyabaya ne poso batatula kwabenamo kufumatu *ponkapa*, ne kwabenamo kufuma *kuno*, kabiji bintu, ne mafunjisho. Kabiji pano kimonaitu, konse konse. Mwamona? Kimweshatu mba kechi kyayukanyikwa ne. Aba baketekela mu tubungwe bunke bwato, kiji—kiji kyabula kuyukanyikwa.

⁷⁵ Pano, mwakonsha kwamba mba, “Mulongo Branham, obewa ubena kwitutwala ku musapi ungi mukatampe kuno. Obewa ubena kupeta kipikicha kyabaya kyafita.” Kabiji Nakebele kuuba kyokyo. Nakebelenga kwi kyuba.

⁷⁶ Amiwa ne kyubile mambo a kintu kimo, pakuuba mba Amiwa ng’ambe kikye. Bushe kujipo kintu kyayukanyikwa nyi? Ee. Kuji kintu kimo kyayukanyikwa. Oo, Amiwa njibingi na lusekelo pa kyokyo, amba kuji kintu kimo kyo mwakonsha kubikamo luketekelo lwenu, kabiji ne kwikala washininwa mba kijitu bulongo. Oo, inge bintu byonse byaya, *Akye* kikemana. Inge mwakonsha kutanga Mateyo Wazhila 24:35, Aye waambile mba, “Meulu ne ntanda bikapita, pakuuba Kyambo Kyami kechi kikankakalwa ne.” Lesa uji na kintendekesho kimo.

⁷⁷ Mulongo umo mukote, waambile kimye kimo, wafituluka mukote wa ku Kabeta kabulenge. Wasendele Baibolo, kabiji kechi wakonsheshe kutanga ne. Kabiji baambile mba, “Kika kyo ubena kwikisendela, Sam?”

⁷⁸ Aye waambile mba, “Ke—ke Baibolo Wazhila.” Waambile mba, “Kyanembwa pa Kikye.” Kabiji waambile mba, “Nekiketekela, kufuma ku c kufika ku c, kabiji naketekela c nanji,” aye waambile mba, “mambo uji na ‘Baibolo Wazhila’ wanembele byobyo.”

⁷⁹ Kabiji awa mulongo waambilenga kwi aye, amba, “Obewa kechi waketekela mba byonse biji Monka?”

Waambile mba, “Ee, mwane. Amiwa kine naumvwa.”

80 Aye waambile mba, “Pano, kyawama, ubena kumbula mba ukoba kiji kyonse kyaamba Baibolo mba uba nyi?”

Aye waambile mba, “Ee, mwane.”

81 Waambile mba, “Pano byepin umvwe Baibolo waambile mba Sam toloka kupita mu *kyokya* kibumba kya mabwe? Wafwainwa kuba byepi?”

Aye waambile mba, “Nakonsha kukiluka.”

82 Aye waambile mba, “Kyawama, pano, musakupita byepi mu lubumbulu wa jibwe kwakubula kipeze kokwa nyi?”

83 Aye waambile mba, “Inge Baibolo waambile mba Sam toloka, pafwainwa kwikala kipeze popa pakuuba mba Sam afike ponka.” Nanchi, akyo, kijitu bulongo. Kwakonsha kwikala kipeze kokwa.

84 Kintutu kyo wafwainwa kuuba ke kwimana pa Kyambo kya Lesa, kabiji Lesa ukalenga jishinda ja byonse byashala. Oo, akya Kintendekesho kikatampe!

85 Naketekela Aye waambile mba, mu Luka, Naketekela byo kyajinga, pakufuma pa mutumba, Aye waambile ku banababwanga, “Bantu baamba mba Amiwa Mwaana muntu yami ng’anyi?”

Kabiji umo waambile mba, “‘Yelemiya’ kabiji ‘ne bangauzhi,’ kabiji ne bikwabotu.”

Kabiji Aye waambile mba, “Pakuuba anweba mwamba mba Amiwa yami ng’anyi?”

86 Apo ipo Petelo po aambile aya ng’ambilo yayukanyikwa, “Anweba yenu Kilishitu, Mwaana Lesa mumi.”

87 Aye waambile mba, “Mwatookwa anweba, Shimona, mwaana Yona, ke pakuba buntunshi bwa nyama ne mashi kechi bobwimusolwelakyo ne. Pakuuba Ba Taata banji Mwiulu bobemusolwelakyo. Kabiji pa jonka jino jibwe po Nkatunga Kipwilo Kyami, ne binzhilo bya kalunga kechi Bikekishinde ne.”

88 Pano kyokika? Pa bukine bwa Kyambo kya Lesa kyasololwa. Mambo, “Muntendekelo mwajinga Kyambo, ne kyokya Kyambo kyajinga na Lesa, kabiji akya Kyambo kyajinga Lesa. Kabiji akya Kyambo kya alwilwe ke muntu ne kwikala waikelenga muno mwetu.” Kabiji kyasolwejlwe kwi Petelo amba akya kyajinga Kyambo kya Lesa kyashiniikishiwa. Amena.

89 Ao oene mambo Aye kyo aambijile mba, “Ng’anyi wakonsha kuzhachisha Amiwa na ubi? Ng’anyi wakonsha kushiniina Amiwa? Bintu byonse Kyambo mokyanembelwa pe Amiwa, Amiwa ne bifikizha.” Lesa wikishinikishe, amba Aye wajinga Kyambo. Oo, abyoyokiji. Lesa wasolola, Kyambo byo kyaamba, kabiji pano Lesa wikilenga kwikala kyakine, kyaiya yafikizhiwa, kikimweesha.

⁹⁰ Myaka yapita, byo baambile ku kipwilo mba, “Kechi kujipo kintu kya kwamba mba lubatizhilo lwa Mupashi Wazhila ne, aya kengubilotu ya ku mubiji ayo bantu yo bebikamotu beene,” pakuuba aba Bamutambula, bayukile mba akya kya bukine. Abo bayukile mba Lesa wajinga wakine. Kabiji kyashiniikishiwa, posotu, leeo, ng’endo ya Lesa ya Pentekosito yafika mwaya byaalo, yaleta bavula mwi Kilishitu kukila bonse byo bauba.

⁹¹ *Mwenyi Wetu wa Pamulungu*, kechi papita kimye kyabaya ne, pepala wa ba Katolika, waambile mba, Naketekela kyajinga panyuma ya mwaka wapwa, nangwa mwaka wapwa, paji umo, amba, “Akyo kipwilo kya Katolika kyafikile pa baitabila afu milyoni. Ako, ba Pentekosito bafikile pa milyoni umo, faivi aduleendi sauzande.” Amena.

⁹² Kyo kika? Ke kintu kibena kukoma, Kyambo kya Lesa, nakunkumbana monse monse. Twafwainwa kwikala bakusata! Kyakila pa kipimo, kyakuuba mba, pano ne ba Episcopalians, Presbyterians, Lutherans, ne bonse, babena kwiya na kutambulako Bino. Mwamona mu mpwijilo ya Bantu Basulu, mwibomvwa kasa babena kutelaula bapusanapusana: ba Episcopalian, Lutheran, Presbyterian. Kika, kechi mumvwa umvwa ba Pentekosto kuuba bintu byavula ne. Abyo ibyo. Ke bakwabotu. Mambo ka? Bama kunekena kwabo kwa mafunjisho abo, kabiji babwela ku Kyambo. Kubooba mutana kintendekesho, kintu kyakonsha kubula kusukana ne.

⁹³ Mwatana momwa, Mupashi Wazhila ubena kwikala Bumi Bwanji mu bantu, na kwisolola Ayemwine ku ntanda. Kabiji kilengela bantu kwikala na kilaka Kyanji: babula kusukena, kwakubula ne mapata, Kyambo kya Lesa kyasololwa ne kwimwisha Ayemwine, akya Kyambo Akyokine kyaikala mu bumi bwa bumuntu. Ke kintu kyawama bingi! Kechi kujipo kintu kyayukanyikwa pa kyokyo ne. Mwakonsha kumona apo Lesa poalaile, kabiji papo kibena kusololwa. Myaka maaduleendi myaka yapitapo bangauzhi bekyambile, kabiji pano twamona mba kibena kufikizhiwa.

⁹⁴ Kupita monse mu kujimbululwa, kupita monse mu byalupusano, kupita monse mu mafunjisho abantu, byo baeseka kulekesha Kyambo kya Lesa! Byo baeseka kupingakenyamo kufunda. Baeseka kupingakenyamo, kulenga dinominesheni. Belubakanyatu abo beene. Kabiji kufuma mu byonse, Kyambo kya Lesa kyakimanatu kyatoka ne kubeka byonka byo kyajinga. Kyokika? Ke kyokya kintu kyayukanyikwa. Lesa waambile mba, “Byonse meulu ne ntanda bikapita, pakuuba Kyambo Kyami kechi kikankakalwa ne.” Nanchi, akyo kyo kintu kyayukanyikwa. Inge obewa ukeba kwimana wanshikama, nshikamikai kyokya Kyambo mu muchima wenu.

⁹⁵ Davida waambile mba Wikifiile mu muchima wanji, amba kechi wakonsha kulenga mambo ne. Aye wanembele mizhilo

Yanji pa mwamba wa mwanya, kabiji wiikashijile pa maboko anji kabiji ne konse konse, wabikile Kyambo Kyanji kimye kyonse kumeso anji. Ajo jo jishinda. Lamai milanguluko yenu kikupu. . .

⁹⁶ Lesa wabujile Yoshiwa mba, “Kechi walukile ku kipiko nangwa ku kilujo, kufuma Kwiakyo ne. Popo ukalenga jishinda jobe kwikala jashukwa. Nanchi popo ukekala na ngyalutwe yawaina.”

⁹⁷ Kabiji kipwilo umvwe kyakwatakana pamo akyokine kufuma ku mafunjisho a bantu, ne kwikala pa Kyambo kya Lesa, apo kipwilo po kikekala na ngyalutwe yawama. Akyo kyo kintu kikakanya komyunizimu.

⁹⁸ Kika kyalengejile komyunizimu. . .? Kintutu kimo, mulanguluka mba “komyunizimu,” byo bakumbanya ng’ambilo yabo, kabiji ne nkomeno ya kutolauka kwabo, mu mamilyoni, kabiji bantu baji bingi na moyo nanji: awa komyunizimu ukapwa ne kufwa wafwa. Kyafwainwa. Komyunizimu, bakonsha kuuba *kikye*. Bakonsha kuuba *kyokya*. Naketekela mba Lesa ukekingijisha, bino, abyo ibyo, byonka byo Aubile Nebukaneza. Aye ukeyyuba, aye—aye—aye. . . yonse seku, ikafumishiwamo, na komyunizimu. Bino, akya. . . Ine, kyakijisha pa kyokyo. Bino, talai. Bino kine kintu, komyunizimu, ukekala na mpelo. Komyunizimu ukeya kumpelo yanji.

⁹⁹ Pakuuba Kyambo kya Lesa kechi kiji na mpelo ne, mambo Kechi kyajinga na ntendekelo ne. Amena. Kyaikala Peenape na Lesa. Kabiji umvwe wajimbwa, kabiji Kyambo kyaikajikwa mwi obewa, obewa wi Peenape na Kyambo. Amena.

¹⁰⁰ Kyafwainwa kwiya ku mpelo yakyo. Abye bintu byonse bibena kuzakama. Nangwatu bashimike mashiki abaya byepi, byafwainwa kupona. Bintu byonse byabula bya, bimeena kyokya Kyambo, nangwa kyapusanako nakyo, bikapita. Bikapana mpuzha, mambo Kyambo kibena kwiya na kushinda. Kechi kujipo kintu kyakonsha Kwikikanya ne. Lesa ye wikyambile.

¹⁰¹ Inge Aye Wikyamba, meulu ne ntanda bikapita, pakuuba akyo Kechi kikankakalwa ne. Fyai kyokya Kyambo mu muchima wenu, mwakusendela kyokya Kyambo ne Kwikileka kyakoma. Anweba Kilamaitu mu milanguluko jobe, kimye kyonse, mambo Kechi kikankakalwa ne. Kyambo kya Lesa kechi kikankalwa ne, mambo Aye waambile mba Kechi kyakonsheka ne. Nanchi tubena kukeba kwikilama pa kyokyo.

¹⁰² Pano, Paulo waambile, mu Binembelo, nobe kufunjisha mushilikale, mushilikale ku kilulumo. Bino, mushilikale wafwainwa kufunda mvumino yanji. . . yangengele nangwa ntolopita. Aye kechi uyuka ne inge ntolopita yamvuma, yaimba, kana ku—kana kuya kulutwe nangwa kubwela panyuma. Inge kechi wayuka lupusano ne, mwakonsha kwikala na mazhita amvwanga—kana a musango ka? Mulwanyi wakonsha kine

kushinda jibumba ja bashilikale abo babula kufunjishiwa bulongo kukila pakyokyo ne. Amena.

¹⁰³ Alo lolukatazho luji na bipwilo byetu leelo. Twibafunjisha pa mafunjisho a bantu, na kupusanyako umo kufuma ku mukwabo.

¹⁰⁴ Twafwainwa kukwatakana. Twafwainwa kuyuka ntolopita. “Pano ntolopita yo ika?” baamba mba. Ntolopita ya Mamboawama, ayo yo Iyo. Akyo Kyambo kya Lesa mumi ke Ntolopita. Kechi mumvwangeko kintu Kimo ne.

¹⁰⁵ Kechi muswishe muntu umo kwimba kisekeseke kya ki French ne, kabiji ne mukwabo wamvumya ngengele ne. Kafwako nangwa umo wayuka byakuuba ne. Kiletatu kivundakanya.

¹⁰⁶ Kabiji Paulo waambilenga pa kufunjisha muntu kumvumino. Kabiji byonka biji akya kilulumo, aye uyuka byafwainwa kubiwa, mambo ngengele yapana mukambizho, kufuma ku kapitawa mukatampe. Kabiji umvwe wavumya iye ntolopita, mazhita bayuka kine kifulo kya ku—kuyako, kabiji ne kwepi kwakubwelela, kabiji kana kwalukila ku kilujo nangwa kukipiko, nangwa byafwainwa kuuba, monka mu kuvuma kwa ntolopita.

¹⁰⁷ Pano, mazhita, nkondo, kimye kyonse kikalatu ke nkondo. Atweba kechi twatwelele mu Kipwilo nangwa kwiya mu Kipwilo, pakuuba mba twiye na kukaya ne. Twafwainwa kuyuka mba tubena kwiya mu kifulo kya nkondo.

¹⁰⁸ Amiwa kechi naiya pakuuba mba mu papashenga pa nyuma yami ne kwamba mba, “Mulongo Branham, obewa wi muntu wawama.” Ine, mwane. Naiya koko na jikebo. Amiwa kechi mbena kukeba jikebo ja kyokyo ne. Naiya na kipopo kya nkondo ne bivwalo byankondo. Naiya na kulwa, kulwa kila ntampulo iji yonse.

¹⁰⁹ Lesa wabujile Yoshiwa, “Kifulo kyonse pa kanyata kulu nkobe, Nakupa ke kyobe.” Nanchi, tapulo ya lumbulwile mba kifulo ke kyobe.

¹¹⁰ Kabiji umvwe kipwilo kyafika pantu pamo, ke kunekenya bintu na mafunjisho abantu, kabiji ne kunekenya Kyambo, kabiji kinekenya na ntanda, Nalumbulula kuuba mba, nanchi ke kutaya mpuzha. Ke kwiitambula.

¹¹¹ Kyo tubena kukeba bufuku buno ke bashilikale kutambula mulaye yense wa Bulesa wa yuwe Baibolo, ao Lesa ye alaile ku Kipwilo, byonse bya nkondo bya Lesa, kabiji ne kwimana. Kyokyo tubena kukeba, bashilikale; kechi kuvwala unifomu pakwimana ne, kikala kimye kyonse kyapusanako. Umvwe muntu. . .

¹¹² Kyaalo kiji kyonse, kiji na bashilikale ba bufyafya mu kyaalo kiji kyonse. Tuji na bashilikale bena German ba bufyafya muno. Tuji na bashilikale ba bufyafya bena Mangalande muno.

Tuji na—tuji na bashilikale babufyafya amwa mu England. Babena kuuba ka? Babena kukeba kutana musango ka wa bintu bya kwingijisha, musango ka wa mbomba, mukwabo byo aji nabyo. F.B.I. bavula mu kyaalo kiji kyonse. Babena kukeketa, amba bamone. Abyo byo bapuluka. Abo bakeketa na kumona musango ka wa mbomba bakwabo ye baji nanji. Kabiji babwela balengamo wakila kuwama pacheche, nangwa kulengamo kintu kimo kyakupana bukikizhi. Abo kechi beketekela umo na mukwabo ne, mu byaalo, mambo akyo kimwesa mba byaalo bibena kuzakama. Kika, England wakonsha kwitusansaula, mu awala umo, inge twakonsha kukilang'anya kulutwe yabo, nangwa atweba twafwainwa kwibasansaula. Kisendatu muntu umo watangilapo ku kyokya kintu, pakuuba mba atome pacheche nangwa abiji, ne avula, nangwa kukakalwa na kintu kimo, kabiji kyabwela kyaya.

¹¹³ Kuno kechi papita kimye kyabaya ne, bakonsha kwamba mba, tubipe tuheche, “Twalengwa mu Japan,” mu kimye kya nkondo. Bakonsha kwikitaya panshi, ne kwendauka na kuzhokoloka, na butemwe bwakyaalo kyobe. Kabiji wafwainwa kulipila mutengo wabaya pakyokyo kukila pa kyonse kyo mupota mu kyaalo. Kika kyamwekele? Abwa bulipila bumi bwa booba bansongwalume bafwile kokwa? Kyakine.

¹¹⁴ Kyo kika? Amiwa kechi natako muchima ne nangwa mulwile byepi bintu bya kumubiji, anweba mubena kuya, kechi kikalumbululapo kintu nangwa kimo ne. Kikasukena. Bino kuji nkondo imo yo wakonsha kutwelamo ne kwangata mpuzha yobakabula kukutambula ne. Ako ko kuvuma kwa Mamboawama a Ntolopita ya Kyambo kya Lesa, kabiji watambula bya bupe ne milaye yo Apaine ku Kipwilo. Kyakine byo kiji. Pano, twatana kuuba mba—twatana kuuba mba, kupana iye mvumino ya ntolopita.

¹¹⁵ Pano, kyaalo kiji kyonse kyeseke kupana bilwilo byawama ku bansongwalume baabo byo bakonsha kwikala nabyo. Bino, Nayuka mba, bimye bimo abye bilwilo kechi byapela kusenda ne.

¹¹⁶ Najinga na mulongo, “Rookie,” bamwichile, waya kukwe, kabiji bamazhita bamupele kisendwa kya naite-paundi munyuma yanji. Kabiji akyo kijitu pepi na kinemenezhi kyanji. Bamupele fosholo, wakupoyako kimbo; laifo, kabiji ne mulumba wa mambomba a kumaboko. Kabiji, oo, Amiwa kechi na kimonapo akya kipe ne! Awa kamulanda mulongo muheche wakakelwe ne kwenda. Kabiji bamutwajile mu kukwakwa na kunyema faivi-mailoshi. Kyafwaijilwe kumwipaya. Aye waambile mba, “Ngakye kyabula maana kyo kika? Kika kyo Mbena kukeba nakikye kipopo kikatampe kyabaya?” Pano, talai. Mazhita bayuka mba kimye kimo ukekikebanga. “Kika kyo mbena kukebela fosholo, mumwe mu mukwakwa

wamukatampe, na kwenda?” Kyawama wapijilwa kwibingijisha. Wafwainwa kwibikeba.

117 Kafulumende kechi wakonsha kupana kintu ne kana bayuka mba . . . bayuka mba ukebingijisha. Obewa wafwainwa kufunjishiwa pa kyokyo. Batana bintu byakila mu kuwama, bya kupana bukikizhi kwi obewa, mambo abo batamuchima wabo mu kyaalo. Abo basaka obewa waikala wakikizhiwa bulongo, kufuma ku polopolo. Kimye kyonse byokikala.

118 Kyatatwile mu bujimi bwa Edena. Kabiji Lesa ufunjisha Kipwilo Kyanji. Kabiji aye . . .

119 Mwayukatu, atweba kimye kyonse tuya nakuwaminakotu. Pano, mandeke akala otwaingijishanga mu kimye kya Nkondo Itanshi ya Ntanda yonse; Nkondo Yabubiji ya Ntanda yonse, kika, aa mandeke acheche a mulwelele ajinga apwa mwingilo, kimye kyo balengele aa mandeke awama abaya obajinga nao. Kika, ajinga abula kintu ne. Kabiji pano, aa obaingijishe mu iye nkondo yapeleleko, pano apwa kinto. Kechi beakeba jikwabo ne. Banji na majeti. Kabiji, monai, kimye kyonse tubena kweseka kuyatu palutwe, mu kuwamisha bya nkondo.

120 Bino mwayuka kine kintu nyi? Lesa kechi ukomenako ne. Lesa wapaine ku baana Banji, bashilikale Banji, kintu kyakila kuwama kyo akonsha kwibapa. Byo Ebapele, kika Aye kyo ebapele? Aye wibapele Kyambo Kyanji mu bujimi bwa Edena, kabiji muntu wikikizhe ayemwine kunyuma ya Kyambo kya Lesa, ne diabola kechi wakonsha kwibatana ne. Ikalai mu Kyambo.

121 Pano, mulwanyi wampeselo, Satana, waesekele kutana kyo akonsha kuuba. Nanchi aye—aye wayukile mba wakonsha kuwa na kumujimbaika aye, nanchi kintu kmo kyo akonsheshe kuuba ke kumulengela kutwela mu bya kutwelelelamo. Kabiji abyoy Lesa byo engijisha leelo, mu kukikizha Kipwilo Kyanji, ke Kyambo Kyanji. Kabiji Satana waiya na bulume bwa kutwelelelamo. Satana wayukile mba akya kyo kyajinga kipeze. Aya yajinga mpuzha yapela pa kwibatwelelela bantu, kyajinga ke kutwelelelamo.

122 Anweba mwaba mba, “Pano, ndekai twelelelamo. Bino bushe kyafwainwa nyi?”

123 Inge Lesa waambile mba lukebewa, lukebewa, nangwa twafwainwa kujila, ne boohoo, ne kuuba byonse *bye*. Inge Lesa waambile mba lubatizhilo lwa Mupashi Wazhila lukakebewa, Amiwa kechi nasakamana ne nangwa Kineeme byepi, kabiji nangwa uleke bya muntanda byavula byepi, obewa Ukamwingijisha, juba ja ao mooba, pakuuba mba wikale na bumi. Jojoka jishindatu jakupulukilamo.

124 “Pano, twafwainwa kufunda lubuko lwa Bulesa, kasa tuji na madokotala awamisha pantanda?”

125 Lesa wakupele lubuko lwa Bulesa mambo Aye wayuka mba obewa wafwainwa kwilwingijisha. Aye wakupele bya bupe bya Mupashi.

126 Kabiji ponkapotu Satana byo afikile kwi Eva, watatwile kutwelelamo nanji. Pano, “Kine, kine, Lesa kechi wakonsha kuuba kyokyo *ne*.”

127 Bantu baamba leelo mba, “Kechi kujipo kintu kya kwamba mba ngehena *ne*.” Bavula ba mwiabo bakonsha kukubuula kyokyo. Mwamona? “Oo, kine Lesa kechi wakonsha kusoka baana Banji *ne*.”

128 Kyakine, Aye kechi usoka baana Banji *ne*. Pakuuba diabola wakonsha, banji. Obewa wi mwaana wa kwa ng’anyi? Akyo kyo kintu kyalondelapo. Kalunga kabafu kalengejilwe diabola *ne* baana banji, kechi baana bakwa Lesa *ne*. Kafwako nangwa umo wa mwiabo ubena kuya kokwa *ne*. Abyo ibyo. Kiyilatu kana wi mwaana wakwa ng’anyi.

129 Pano, Lesa wapaine kwi Eva *ne* Adama Kyambo Kyanji, kabiji Aye kechi wakingya *ne*. Aye kimye kyonse wajinga... Awa Mwinakilishitu, nangwa waitabila, Bukikizhi bwanji ke Kyambo.

130 Meulu *ne* ntanda bikapita. Mafunjisho onse a bantu akapita. Dinominesheni yense ukankakalwa. Kyaalo kyonse kikebila. Bino Kyambo kya Lesa kikemana, Peenape. Kukekala kimye ntaanda wakumakya kechi ukasama kutwajijila *ne*. Kukekala kimye juba po jikabula kusama *ne*, kabiji *ne* ng’ondo kechi ukasama *ne*, kabiji ntanda kechi ikazhokoloka *ne*.

131 Pakuuba Kyambo kya Lesa myaka *ne* myaka kikekalatu pamo. Ee. Akyom ke kintu kibula kwenda, ke kintu kyo mwakonsha kuketekelamo. Kya kine. Lesa wamba kiji kyonse, kyafwainwa kine kumweka.

132 Inge Aye waambile, mu bujimi bwa Edena, na mambo Mukuzhi, amba Aye ukatuma Mesiyasa, wajinga wafwainwa kwiya. Nangwatu bapembejile pa myaka foolo sauzande, bino Aye wafikile. Aye wayishile mambo kyajinga Kyambo kya kwa Lesa kyalailwe.

133 Lesa walaile ku mutuma Aye jibiji. Aye ukafika pano. Amiwa kechi nasakamana *ne* nangwa kwikale bantushi *ne* bakajimbulushi, nangwa bobo kyamusango ka, nangwa komyunizimu akumbane byepi, Yesu Kilishitu ukeya, kabiji tukekala nsa Kipwilo kya omvwewa-na Mashi, kabiji Ukekisenda kupita-mulwelele kuya Mwiulu. Kika? Kyafwainwa kwikala byobyoyo. Kyambo kya Lesa kyaambile byobyoyo.

134 “Inge mwakonsha kuketekela, bintu byonse byakonsheka kubiwa.” Akyo kyakine. Lesa wikyambile, kabiji kechi kyakonsha kwenda *ne*, kechi kyakonsha kusukena *ne*. Lesa

ye waambile byo byo, inge waikalatu nakyo (Pano...) kabiji waikala na lwitabilo mwi akyo, kiketekelai.

¹³⁵ Kechi mvumino yabula kuyukanyikwa ne. Lesa kechi wakonsha kupana mvumino yabula kuyukanyikwa ne. Mafunjisho a bantu akonsha kupana mvumino yabula kuyukanyikwa. Madinominesheni akonsha kusapwila mvumino yabula kuyukanyikwa. Bino Lesa kechi wakonsha kwamba mvumino yabula kuyukanyikwa ne. Kabiji akye Kyambo ye Lesa. Kabiji kechi kyaikala kyabula kuyukanyikwa Pakikye ne. Kyonsetu kyayukanyikwa.

¹³⁶ Pano, Kipwilo kikatampe kyamvwikwa bya nkondo na Kyambo. Pano, kimye Yesu kyo aishile, bushe Aye waingijishe abya bya nkondo bimoto? Aye kine wikyubile.

¹³⁷ Kimye Satana kyo aishile kwi Aye, mu bulume bwanji bonse, kabiji aye waambile mba, "Inge obewa wi Mwaana wakwa Lesa, uba *bikananga*, *bikananga* bintu bimo."

¹³⁸ Aye waambile mba, "Kyanembwa mba..." Kubwela ku Kyambo. Satana wamwesekele kumutwala Aye palepako. Bino, Yesu, wabweletu ku Kyambo, "Kyanembwa mba..."

¹³⁹ Apa Waikela popa, pa kyokya Kyambo, kasa abena kumweshwa kwi atweba kya kumwenako. Nobe byonka byo Aambile mu Kolinda Mutanshi, patanshi... Yoano Wazhila 14:13, "Nemushila mwakulondela." Kabiji akya ke kyakumwenako, pakuuba mba twimane pakosa, twafwainwa kubika luketekelo lwetu mu Kyambo kya Lesa. Lekai bintu byonse bikale bya bubela. [Kafwapo bijipo pa tepu ne—Waku.]

¹⁴⁰ Akyo kyo kintu kimo kyayukanyikwa. Lesa walaile. Lesa ukalama mulaye. Baamba mba, "Akye *kintu* kyakonsha kumweka byepi? Wakonsha kupwizha byepi pamo jibumba ja bantu, na lusa Lwakushikulwa, kuya mwiulu?" Amiwa kechi nayuka Aye byo akooba ne. Kechi mwingilo wami wakwipuzha byo Akeyyuba ne. Mwingilo wami ke wakwinengezha ku kyokyo. Aye wikilaile. Kikamweka. Wakikizha Kipwilo Kyanji na Kyambo.

¹⁴¹ Kabiji kintu kitanshi kyajinga kutwelelelamo. Pano baamba mba, "Bushe kechi kyafwainwa pano ne, inge Amiwa ne wa *mukikye* kipwilo, bushe akya kechi kijitu pamo byonka biji *kyokya* kipwilo ne?"

¹⁴² Kujitu Kipwilo kimo kyo wakonsha kwikalamo membela. Obewa kechi Ukenungako ne. Obewa wafwainwa kwinunga ku kifulo kya bwenyi, kifulo kya bwenyi kya Methodist, kabiji kifulo kya bwenyi kya Presbyterian, kabiji kifulo kya bwenyi kya Baptist, kabiji kifulo kya bwenyi kya Pentekosito. Pakuuba obewa wasemekwa mu Kipwilo kya Yesu Kilishitu, nanchi akyo kyo Kipwilo.

143 Abyo ke bifulo bya bwenyi, amo bantu mo bapwila pamo, nobe bikwangala byaikala pa *yuwe* musapi, kabiji bakunda pa *yuwe* musapi, kabiji—kabiji ne bikwobotu. Alo lo lumvwang’ano lwa bupopweshi bo muji nabo pamo, inge mubena kuja kajo kamo.

144 Pakuuba inge kyafika ku Kipwilo kya Yesu Kilishitu, kujitu jishinda jimo. Ajo ke Kusemwa. Kusemwa!

145 Kijitu pamo nobe muntu, nobe byonka byo Naamba bimye byavula, nobe ng’onyi ufitu waikala pa musapi, kasa keseka kubika mayona a nduba ku byapi byanji, ne kwamba mba, “Mwamona, Amiwa ne nduba na bwitote.” Mwamona? Aye wasomekamo mayona, ayemwine. Inge wajinga nduba wakine, kiseumwa kyanji kyakonsha kulupula aa mayona.

146 Inge Kipwilo kya Lesa mumi ke Kipwilo kya Lesa mumi, Kikaleta Kyambo kya Lesa mumi. Obewa kechi wafwaunwa kunungako mayona a nduba ne. Kabiji jonse jiyona jikanungakana na nduba. Obewa wakonsha kuketekela kyokyo. Kabiji jonse jiyona jinunga ku Kipwilo kya Lesa kikekala Kyambo kya Lesa. Aye kechi ukaletapo kintu kikwabo ne kanatu Kyambo. Amena. Mambo, musango wa Mupashi ulupulatu Kyambo. Amena. Mbena kumvwa ng’umvwino ya bupopweshi. Ibyo.

147 Kafwako nangwa kimo kyo wakonsha kuuba ne, kafwako nangwa kimo kyo wakonsha kulenga ne. Obewa kechi wakonsha kulenga-. . .Obewa kechi wakonsha kulenga lupulukilo ne. Obewa kechi wakonsha kulenga byabupe ne. Obewa wafwainwa kupanga byabupe. Kyakine. Mwamona? Aye—aye mukoko kechi wikyuba ne, aye kechi ulenga booya ne. Aye uji na booya mambo ke mukoko. Aye wikalatu na booya. Akya—akya—akya kichi kya cheli kechi kilenga macheli ne. Akyo kipangatu macheli, mambo bumi bwakyo byo buji.

148 Kabiji Kipwilo kya Lesa mumi kechi kibikamo Bibye, ne kweseka kwilenga abo bene bamweke kintu kimo ne. Baji kala byo baji, konka lwa Lesa. Kabiji Kyambo kya Lesa kyakwatakana nabo, kabiji abo bakwatakana na Kyambo. Kabiji mingilo yaletelwe mu yewa walumbuluka, Yesu Kilishitu, Lesa wamwekele mu mubiji, ikelupula ayo ine monka mu kusemwa-jibiji kwa waitabila. Aye waambile byobyoy. Amena. Kafwako kikwabo ne. Pano, akyo ke kintu kimo kyayukanyikwa.

149 Pano, kyafwainwa kwikala pacheche—pacheche kyazhobakanako ku muntu, inge kechin wayukile kuvuma kwa ntolopita ne. Pano, muntu wabula kufunjishiwa bya ntolopita, kabiji wabula kwiyumvwapo kala ne, kyawama, wakonsha kwikala walubilamo pacheche inge waumvwa kintu kyavuma mwapusanako na kyokya kyo aumvwinapo kala. Aye kimye kyonse umvwatu mba, “Twela mu kipwilo. Tolai kalata

yenu *kuno* kabiji ne *kuno*.” Akyo kyakonsha kwikalatu bulongo. Abyo ibyo aye byo ayuka.

¹⁵⁰ Bino umvwe waya mba ubwelepo jibiji, pa lubatizhilo lwa Mupashi Wazhila, kwamba pa bulume bwa Lesa ne bintu Aye byo oba; kabiji ne byo kilengela banabakazhi ne banabalume kwikala, bonse, kwitokeshwa abo bene ku bwikalo bwa bubi; byo ebalengela kwenda bulesa, bukishika. Kabiji ne bintu byo oba, ne kuleta lubatizhilo, kwamba mujimi, kubuka bakolwa, kupanga bademona, kwaula, bya bupe, oo, bimwesho, byonse biji mu Kipwilo. Aleluya! Abyo ibyo. Umvwe waya, nanchi wikala walubakanako kwi abo babula kumvwapo musango wayoya ntolopita.

¹⁵¹ “Kyawama,” mwaamba mba, “kipwilo kyami kechi kifunjisha byobyoye ne.” Nanchi kechi kibena kuvumwa ntolopita ya Mamboawama ne. Lukumo! Ibyo.

¹⁵² Pakuuba abo bashilikale bafunjishiwa, aleluya, umvwe baumvwa aya ntolopita yamvuma, bayuka bya kwimana mu ndonda. Twayai, mushilikale Mwinakilishitu! Lukumo! Oo, akyo kine!

“Wayuka byepi mba kyakine?”

Kiji pa Kyambo.

“Kyawama,” mwaamba mba, “kipwilo kyetu kechi kifunjisha Kyokyo ne.”

¹⁵³ Pakuuba ntolopita imvuma Byobyoye. Amiwa kechi keba kufunjishiwa ku lufunjisho lwa kipwilo ne, mambo kikasukena kabiji ne kupona. Pakuuba inge bafunjishiwa ku Kyambo, meulu ne ntanda bikapita, kabiji akye Kyambo kechi kikapita ne. Mafunjisho onse a bantu, bintu byonse bikwabo, bikapona. Pakuuba akye Kyambo kechi kikankakalwa ne. Amena. Ayo yo mvumino. Ayo yo mvumino yo Nkeba kumvwa. Ee, mwane.

“Oo,” mwaamba mba, “Nakonsha kuyuka byepi?”

¹⁵⁴ Yesu waambile mba, “Mikoko yami umvwai jiji Jami. Abo bayuka ntolopita Yami.” Aye waambile, mu Yoano Wazhila, kyapitala kyabu 14 ne veeleshi wabu 12, “Aye wangitabila Amiwa, mingilo Yonguba ne aye ukeyuba.” Pano, Aye waambile kyokyo.

Inge muntu waamba mba, “Kyawama?”

¹⁵⁵ Bahebelu 13:8 waamba mba, “Yesu Kilishitu ujitu pamo keesha, leelo, ne myaka yonse.”

“Oo,” abo baamba, “mujishinda jimo.”

¹⁵⁶ Pano, mukoko wakine ukamba mba, “Uu-oo. Oo, kintu kimo kyajikujila, mu kyokyo. Akyo kechi kyaumvwanikile bulongo ne. Oo, awo wafwajilwe kwikala lusengo waki French. Akyo kechi kyajinga ntolopita ne, mambo Baibolo kechi upanapo mvumino yabula kuyukanyikwa ne.”

157 Waamba mba, “Anweba mukatambula Mupashi Wazhila.” Kechi mba, “Mwakonsha.” “Mwafwainwa, bonsetu.” Bimye binga? “Ku baana benu, kabiji ne baana babaana benu, kabiji ne baji kwalepa, ne bonse mo bavujila Nkambo Lesa wetu bo aketa.” Aye ukavumya ntolopita mu mutundu yense ne kisemi kyonse, kabiji bakomvwa Jiwi Janji. Abo Bakekiketekela, aba batongwejilwe jimo ku Bumi. Amena. Abo ba Kekiketekela mambo bayuka mba Ke ntolopita ya mamboawama ibena kuvuma. Kechi yabulakuyukanyikwa ne. Yense mushilikale wayuka bya kwimana.

158 Pano, mwamona Petelo, ne Yoano, Yakoba, ne kipwilo kitanshi, kuya kulutwe na kufoola mujije jishinda, mambo ntolopita, Yesu, waambile mba, “Yainga panopantanda ponse, na kusapwila Mamboawama.” Mako 16, monai, “Abye biyukilo bikebalondelanga baitabila.” Twamona Petelo, Yakoba, Yoano, ne bonse bashala kutatama, na kufoola ku Kyokyo.

159 Kabiji atweba tubena kwalulukila kuntun kukwabo, kufuma Kwiakyo? Umo ubena kuya kulutwe, mukwabo ubena kuya lunyuma? Umo ubena kwamba mba, “Kyawama, akyo kyajinga kya kimye kikwabo. Amba, aya—aya mvumino, yajinga ya kimye kikwabo.” Oo, ine. Kuuba kyaikala byobyo ne.

160 Yonse zhita yabena Kilishiti yumvwa ntolopita. Lesa waambile mba aya yajinga ntolopita. Aye kechi wakonsha kwikipipula ne. Ayo iyo mvumino yo Aambile mba ikavuma. “Akwe kobakayukile bantu bonse,” kabiji Kipwilo kyaya ne kuya.

161 Bamo mwiabo kechi baketekela mu Kwiya Kwanji ne. Aye Baibolo waamba mba Ukeya, nanchi tubena kupembelela Kwiya Kwanji. Inge Aye kechi waiya bufuku buno ne, tukapembelelanga mu lukeelo. Inge Aye kechi waiya lukeelo ne, tukamupembelelanga Aye keesha bufuku. Kabiji tukatwajijilatu na kupembelela. Inge twapona mutulo, yetu—yetu. . . atweba kechi twafwa kyangutu ne. “Mambo ntolopita ya kwa Lesa ikavuma kabiji ne bafu ba mwi Kilishitu bakasanguka. Kabiji atweba tukatanwa bomi tukashikulwa nabo pamo, na kumukumanya Nkambo mulwelele, kabiji tukekala konka myaka ne myaka.” Ayo yo mvumino ya ntolopita. Nkoka nkotanwa Amiwa nangwa nkonaya Amiwa, kechi kijipo nalupusano ne. Amiwa nkomvwa jiwi. Amiwa kabuka. Lukumo lwikalale kwi Lesa! Kubuka. Oo, ee. Ee.

162 Yesu waambile, mba, “Mikoko yami umvwai Jiwi Jami.” Aye wajinga Kyambo kyasololwa. Umvwe aye. . . Abyo mikoko Yanji byo Yamuyuka.

163 Pano talai ku Bafaliseo ne bakwabo ba mu joja juba. “Oo,” baambile mba, “awe Muntu ke Zelebabuba.” Kimyen Aye kyo abujile mwanamukazhi pa mushima, kwepi, mambo a bubu bwanji, banabalume bo ajinga nabo, byo abuuji Natanela

nkoajinga, mushi ya kichi amo Filipa mo amwichile, kufuma mushi ya kichi kya mukuyu, na kulomba, kika, abo bafunjishi ba joja juba baambile mba, “Awe Muntu ye Zelebabuba. Aye ke diabola. Aye ubulang’ana biji mu bumi bwa bantu.”

¹⁶⁴ Bino akyo kechi kyajinga byobyo ne Petelo, Yakoba, ne Yoano, ne bonsetu bashala. Abo bekiyukile. Kika? Bayukile mba Lesa waambile mba kimye Mesiyasa kyo akeya, na jiwi ja shingwa manyi jakwa Mosesa, Aye ukekala ngauzhi. Kabiji byo bamwene byobyo bintu Aye byo aambile mba bikasoloka ne kulumbuluka, abo bayukile mba aka kajinga kajo ka mikoko. Abo bayukile mba aya yajinga ntolopita. Kabiji batatwile kwi ilondela. “Mikoko yami ikiyuka,” mambo bamwene Kyambo kya Lesa kyamwekanyikile.

¹⁶⁵ Pano, bantu leelo, abo kechi baketekela mba kuji kintu kya kwamba mba lubatizhilo lwa Mupashi Wazhila ne. Mwayiya muno nangwa kuntu kumo kobaji na Mupashi Wazhila, kabiji bamwene mulaye wakwa Lesa wafikizhiwatu bulongo, kika, “Mikoko yami umvwa Jiwi Jami.” Abo bayuka jiwi ja ntolopita mambo ye Baibolo. “Yesu Kilishitu ujitu pamo keesha, leelo, ne myaka yonse.” Aye ukijitu Bahebelu 13:8, byokiji.

¹⁶⁶ Amiwa kechi nasakamana ne, bino, kechi kipanapo lupusano ne nangwa masengo avula a bipwilo abena kuvuma. Tuji na masengo avula bingi a kipwilo, mwayukatu, na kuzhokoloka ku bintu byonse, ne kwamba mba, “Oo, moba abya kukumya apita. Kechi kujipo kintu kya kuuba mba lubuko lwa Bulesa ne.”

¹⁶⁷ Oo, mukoko wakine kechi uteleka ku kyokyo ne. Bino abo bateleka ku aya ntolopita, aya ngyalutwe.

¹⁶⁸ Aja jisengo ja kipwilo jakonsha kumvuma kiji kyonse. Obewa wafwainwa... Talai byo kiji leelo, mansengo a bipwilo. Umo Ubena kunyemena *mujije* jishinda, kabiji mukwabo ubena kunyemena *mujija* jishinda. Kabiji diabola waikala ne kunyuma, na kwamba mba, “Mulunda, babena kwilwisha umo na mukwabo. Abyo byobyoka. Amiwa kechi nafwainwa kwendesha kuboko kwami ne.”

¹⁶⁹ Bino, mulongo, balekai bonse beye ku byela byankondo pa kimye kimo, bwelai ku mikambizho. Oo, ami! Nanchi musakumona “ngyalutwe, bashilikale Benakilishitu,” ibyo, kechi kuteleka ku masengo ne, kana kuteleka ku ntolopita.

¹⁷⁰ Twayai twimane, pa mineti umotu, kabiji tubwele lunyuma ne kutala pa bicheche. Tubena kunengezha kupwisha, mambo kechi Mbena kukeba kwimulama muno kimye kyabaya ne. Bino twayai tubwele kunyuma ne kutala pa bamo baumvwine jije jiwi. Twayai tutole... Kabiji bajinga banshiniinwa. Bino, Amiwa ne mumwisha bintu byonse kechi byayukanyikwa ne. Twayai tutolepo umo muntu, pa kimye kicheche.

¹⁷¹ Twayai tutole ngauzhi Yoba. Pano, awa muntu wapichile mulweseko, bino wayukile mba Lesa wakebelenga mulambo

wakusoka. Abyo Lesa byobyoby akebele, kabiji abyo Aye byo akebele. Kabiji kwajinga makatazho musango ka ku nzubo kwanji. . . Lesa kimye kyonse kechi. . .

¹⁷² Inge mwamona kintu kimo kyatama ku mukwenu, kechi kyalumbulula mba Lesa ubena kumupuma kikote ne. Kechi kiji kuuba mba wafuma wafuma mu kyaswa muchima wakwa Lesa ne. Aye wayuka mu muchima wanji kana ubena kuteleka ku ntolopita nangwa ine.

¹⁷³ Lesa wakebelenga kitapisho kya kusoka, kabiji Yoba waimene bulongo na kyokyo. Byo byonka. Baambile mba, “Yoba, windengamambo wabufyafya. Ubena kuuba kintu kimo kyatama.” Bino aye wayukile bulongo. Aye waiketetu ponkapa, mambo waumvwine jiwi ja ntolopita, kabiji waiketele nayo ponkapa.

¹⁷⁴ Kabiji, kyapelako, ponka pampelo, kimye kyo ajinga. . . Diabola bamukasulwijile pe aye, ne kusenda kisemi kyanji, kabiji wasendele baana banji, wasendele bang’amela banji, ne bunoshi bwanji bonse, kabiji ne bumi bwaji bonse kechi bwaiketele bulongo ne. Aye waiketele ku kishala. Kyamwekele nonbe bintu byonse byaya. Bino aye waambile mba, “Nayuka Mukuzhi wami uji na bumi. Mu moba akupelako Aye ukemana pantanda. Nangwa mizambo ya mukikoba ya onauna uno mubiji, nangwa byonkabyo mu mubiji wami Amiwa kamumona Lesa.” Kafwapo nangwa kimo kya kubula kuyukanyikwa pa kyokyo, kyajingako ne? Kechi mba, “Na—Na—Na—Nalanguluka mba Aye uji na bumi ne.” Aye waambile mba, “Nayuka mba Aye uji na bumi, kabiji Aye ukemana mumoba akapelako panopantanda. Nangwa mizambo ya mukikoba ya onauna uno mubiji, nangwa byonkabyo mu mubiji wami Amiwa kamumona Lesa.” Oo, ami! Kyamwekele. Aye wajinga wanshiniinwa.

¹⁷⁵ Abulahama, kwenda mu bujimi juba jimo, waumvwine Lesa waamba mba, “Abulahama, Amiwa mbena. . .” Aye wakumenye Abulahama Kyambo kasa kikyangye kunembwa ne, kabiji Aye waambile mba, “Abulahama, Amiwa nkakupa mwaana wamulume ku mukazhi obe, Sala.” Kabiji wajinga na myaka sikisite-faivi pakyokya kimye, kabiji Abulahama wajinga sebetef- faivi. Kabiji benengezhezhe jimo, kabiji aye kechi wajinga na buvu bwa kushimuna ne. Aye wayukile mba ukekala na mwaana wamulume.

¹⁷⁶ Kabiji Baibolo waamba mba, “Aye kechi wazhinaukile mulaye wakwa Lesa kupichila mu kubula Iwitabilo ne, pakuuba washinijilwe.” Amena. Washinijilwe, akyo kyalumbulula mba aye wakumenye wapelako. Amena. Byokiji. Wapelako ke ku mpelo ya mukwakwa. Kyo kintu kyapelako. Ke—ke kyonsetu.

Aye waambile mba, “Amiwa nashininwa mba, kyalaile Lesa, Lesa wakonsha kwikyuba.”

177 Anweba, bufuku buno, mwashininwa mba awe ye Mupashi Wazhila nyi? Anweba mwashininwa mba, aje jo jishinda? Anweba mwashininwa mba, Aye ye Lubuko? Bushe mwashininwa mba Aye ubena kwiya jibiji nyi? Anweba mwashininwa mba Aye ujitu pamo keesha, leelo, ne myaka yonse? Amena. Washininwa! Ee.

178 Twayai tusende umo mukwabo, Elaija, waimene popa pa mutumba. Aye wapachikile ne Yezebele ne kilungi kyanji kyapetwa, kabiji aye wakokele nanji. Pepi nobe banabakazhi bonse balondejilenga ina mfumu mutanshi, kapepo suki yatendwa ne byonse byo bajinga nabyo mu joja juba. Aye wapachikile kyabaya bingi poso kya—kya muleta panshi.

179 Pookapotu, Lesa wamwambijile mba, “Imana uyeko. Mwayukatu, inoka pepi nobe abiji nangwa asatu mu mulungu, konka kuno. Bino waimana kwi Ahaba, kabiji mubulai mba, ‘ABYO BYOBYAAMBA AYE NKAMBO. Kime kechi kikanoke kufuma mwiulu ne poso Neyita.” Oo, ami!

180 Aye kechi waambile mba, “Pano, Ahaba, kapepo, kyakonsha kwingila mujije jishinda.” Oo, ine. Aye washinijilwe, kafwako kyabujilwe kuyukanyikwa ne. “Kime kechi kikanoke ne, mvula kechi ikeya ne, poso Ne ita.” Amena. Lukumo! Oo, kika? Aye waumwvine ntolopita. Kyajinga kya shiniinwa. Aye wayukile Lesa wanji. Aye wayukile mba kintu kimo kikobiwa, kimye Lesa kyo aambile akya Kyambo, meulu onse ne ntanda bikapita poso kya—kya mweka, kyafwainwa kumweka. Aye kine wajinga wa washininwa.

181 Pano, Aye waambile mba, “Elaija, Nasaka namba obewa uye mu kyaalo kyauma, kufika peulu ya mutumba amo mwabula ne masulo. Bino Amiwa nji na imo kokwa.”

182 Aye washinijilwe. Aye wakakajile pa mutumba ne kwikala ku kakola kaku Kaleta. “Kabiji pano Nsakuba byepi kuno?”

“Nakambizha kala ba bikwangala bakukujisha.”

183 “Pano, baji byepi ba bikwangala . . . Pano, pembelaiko mineti umo, Nkambo?” Ine, ine. Ntolopita yavumine. Akyo kyakilapo. “Kyakonsha kumweka byepi? Amiwa kechi nayuka ne. Amiwa kechi natakho muchima ne. Mwamona? Kechi kyami kya kusakamana pa kikyene ne. Ao ke mwingilo wakwa Lesa. Aye waambile mba Wakambizhe ba bikwangala.”

184 “Kyawama, Nkambo, bushe Anweba mwakonsha kwikizhobakanya kwi amiwa, ne kumbula kwepi aba . . . ng’anyi sukuulu aba babikwangala kobaile, na kufunda kwamba Kihebelu? Musango ka wa . . . Bushe bateka pa bitovu bya gasi, nangwa kana baji na mujilo wa kunyi, nangwa kana bekyuba byepi? Kabiji kwepi ko . . . Ng’anyi musango wa nyama ye bakepaya? Abo bakobatu kang’onyi kacheche. Bakepaya byepi ng’ombe wami, pakuuba mba bandetele kashinkwa?” Mwamona? Mwamona? Akya kechi kyaipuzhiwe ne.

185 Lesa, aya—aya ntolopita yakwa Lesa, Jiwi Janji javumine ne kwamba mba, “Amiwa njina!” (Kechi, “Elaija, Nakonsha kwikyuba.”) “Amiwa ne kyuba.” (“Amiwa ke kyuba.”) “Amiwa nekyuba kala.” Amena.

186 Ao ye Lesa wetu, bufuku buno. Kechi, “Aye ukeyyuba ne.” Aye wikyuba kala. Amena. Aye wikyuba kala. Amena. Kechi, “Aye ukeyyuba; Aye kape wakonsha; kapepo Aye ukeyyuba.” Aye wikyuba kala. “Nakambizha ba bikwangala.”

187 Aye wakambizhe Mupashi Wanji ku bantu bonse. Aye wakambizhe mapeshi Anji. Aye wakajijile Mwiulu, ne kupana bya bupe ku bantu bonse. Muntu umo ukamutambula. Muntu umo ukamukana. Kechi mwingilo wami wakuyuka byo eya ne. Byokiji nanchi pakuuba mba afike kokwa. Lesa waambile mba kikekala byokabyo, kabiji byo kiji. Petelo waambile, pa Juba ja Pentekositi, “Lapilai, anweba bonse, ne kubatizhiwa mu Jizhina ja Yesu Kilishitu mululekelo lwa mambo enu, kabiji mukatambula wabupetu, Mupashi Wazhila.” Pano Ukeya byepi? Amiwa kechi nayuka ne. “Aye—aye mulaye walailwa ku baana benu, kwi abo baji kwalepa, ne bonse mo bavujila Nkambo Lesa wetu bo aketa.” Pano, kechi wakonsha kulondolola byobyo ne. Ntolopita yavuma, kabiji Namuketekela. Na mukokejile, kabiji na mutambwile. Amena. Pano kechi mwakonsha kufumyamo na kupachika ne. Amena. Oo, Amiwa kechi ne walumbuluka ne. Ine.

188 Nobe byobya bufuku, nyenga mukote wachiluluka, waambile mba, “Eloda, bushe Nakonsha kupana lushimuno?”

“Ee, maama.”

189 Aye waambile mba, “Amiwa nakeba kwamba kikye kintu kimo.” Aye waambile mba, “Ami—Ami—Ami kechi nji byo Mbena kukeba kwikala ne.” Kabioji waambile mba, “Amiwa kechi nji byo Nafwainwa kwikala ne. Bino, kuji kintu kimo kyo Nayuka, Amiwa kechi nji byo Najinga kala ne.”

190 Nanchi, abyo, abyo byo tubena kumvwa pakino kimye. Amiwa kechi nji byo Naikalanga kala ne, mambo Amiwa napuluka bufuku buno, kupichila mu lusa lwa Lesa, ne kutambula lubatizhilo lwa Mupashi Wazhila, ponka pa mwingilo. Waitulwilwe pa joja Juba ja Pentekositi, mulaye wapaine, kabiji Namuketekejile. Kafwako kyabula kuyukanyikwa ne. Naumvwine jiwi. Nejikokejile, kabiji nashininwa mba byo jiji. Kyakine. Nayuka mba byo kiji. Kine.

191 Shimeyona, mukote pepi nobe myaka eite, myaka ma aduleendi kufuma ngauzhi po aikajijile pantanda, bino nakwendauka na kutalwa bulongo. Aye Mupashi Wazhila waambile kwi aye juba jimo, amba, “Shimona, wayukatu, ubewa kechi ukafwa ne poso ukamone lupulukilo lwa Nkambo.” Lukumo!

192 Kapepo ng'anga mukatampe, na kukwanya myevu yanji bimye bicheche, kabiji waambile mba, "Shimona, wafwainwa kusakula myevu yobe kulubaji lukwabo."

Aye waambile mba, "Akyo kechi kyandengela kwikala wapusanoko ne."

"Wayuka byepi mba uji bulongo?"

"Aye Mupashi Wazhila wambujile byobyo. Amiwa kechi kafwa ne."

193 "Kika, Kyo kimye, kika, obewa wi... Kika, obewa winengezha kufwa."

194 "Oo, Amiwa kechi natako muchima ku byo waamba ne. Pakuuba Lesa wambujile mba kechi Nkamona lufu ne kanatu Namona lupulukilo Lwanji. Kechi pajipo kyabula kuyukanyikwa ne. Amiwa kechi kufwa ne. Amiwa kechi nakonsha kumona lufu ne kanatu Namumona Aye." Amena. Byokiji.

"Ukeyyuba byepi, Shimona?"

"Amiwa, awo kechi ke mwingilo wami ne."

"Uji kwepi Aye, Shimeona?"

"Amiwa kechi nayuka ne."

"Wayuka byepi mba Aye ukamumona?"

195 "Lesu ye waambile byobyo. Byokiji. Ke Kyambo. Amiwa kechi kamona lufu ne kanatu Namumona Aye." Oo, ami!

196 "Oo, kamulanda mulongo mukote. Mambo, wafuma mu mutwe wani, mwayukatu. Nanchi mulekaitu bunke bwanji."

197 Bino aye Wamumwene, nangwa byonkabyo. Ee, mwane. Lesu ulenga jishinda jaboba bantu basenda Kyambo Kyanji.

198 Yesu, kimye kyo Ajinga pano pantanda, kabiji Waimene byobya ku kilende kya kwa Lazalaza.

199 Nangwa, akyo kasa kikyanye, Aye byo ajinga na mikambizho na—na bantu, byo aambilenga mambo a Aye, nangwa byonkabyo kechi wajinga na myaka fifite ne, kabiji waambile mba Aye wamwene Abulahama. Mwamona byo Ajinga na ngyalutwe nyi? Aye waambile mba, "Kasa akyanye kwikalako Abulahama, AMIWA NAJINGAKONKA. AMIWA NAJINGAKONKA." Kechi mba, "Najinga," nangwa, "Amiwa kekala," bino, "AMIWA JIIPO. Amiwa nji na ngyalutwe."

200 Nanchi, Aye waambile mba, ku kilende kyakwa Lazalaza, Aye kasa akyanye kuya kookwa, Aye waambile mba, wambujile Mata, Aye waambile mba, "Amiwa ne lusanguko, ne Bumi." Kechi, "Nafwainwa kwikala byobyo," nangwa, "Amiwa kekala," pakuuba mba, "Amiwa njipo." Amena.

201 "Mulongo wami, inge Anweba mwajinga kuno, inge kechi wafwa ne. Bino nangwa ponkapano, Nkambo, kyonse Anweba

kyo mwakonsha kwipuzha Lesa, Lesa wakonsha kwikipana kwi Anweba.”

Aye waambile mba, “Mulongo obe ukasanguka jibiji.”

202 “Oo, aye ukasanguka mu moba apelako, mu lusanguko lwa bonse. Aye wajinga nsongwalume wawama. Ee, Naketekela mba ukasanguka.”

203 Pakuuba Yesu Wamolwele pakikye pacheche, mwine, mba, waambile mba, “Bino Amiwa ne lusanguko ne Bumi.” Kechi mba, “Amiwa kekala; Nafwainwa kwikala,” nangwa bikwabotu. “AMIWA JIPO.” Kafwako kijipo popo ne, kafwako kibena kuzakama, kusukena pa kyokyo ne. Kafwako kyayukanyikwa ne. Kyajinga kya ngyalutwe.

204 “Amiwa ne lusanguko ne Bumi. Aye waitabila mwi Amiwa, nangwatu afwe, byokabyo ukekala na bumi. Yense uji na bumi kabiji waketekela mwi Ami kechi ukafwa ne.” Kechi—kechi, “Abo kechi bakonsha ne. Kapepo kechi bakonsha ne.” “Abo kechi bakonsha ne. Kafwako—kafwako kyayukanyikwa pa kyokyo ne. Kechi bakafwa ne.”

205 “Aye umvwa Byambo Byami ne kumwitabila Aye watuma Ami uji na Bumi bwa myaka, kabiji kechi ukeya mu Kinje ne, pakuuba wapitaila kufuma kulufu kuya ku Bumi.”

206 “Abo kechi bafwainwa kwiya mu Kinje ne”? Abo kechi bakeya mu Kinje ne. Amena. Aye wasendele Buchibishi bwamambo bwami. Kechi njipo na kyakuba nakwo ne. Amena. Abyo byokiji. “Wapitaila kufuma kulufu kuya ku Bumi.” Oo!

207 Pano aye waambile mba nekiketekela. Bino, Yesu kechi waambile mba, “Kyawama, mwayukatu, byokiji amba mwaketekela kyokyo, kabiji mwayuka mba Amiwa ne Kyambo, kabiji—kabiji Ami—Ami. . . Mwayuka mba Yami Iye wafwaijilwe kwiya. Obewa washimuna kyokyo. Obewa wikiketekela. Amiwa nsakwimubuula byo tusakuuba. Twayai tulate pamo bakulumpe bonse, kabiji tuye nakumona inge twakonsha kuubapo kintu kimo pa kikye.” Ine, ine. Aye waambile mba, “Amiwa nkoba. . .” Kechi mba, “yanga ukamone *inge* Nakonsha kumusangula ne.” “Amiwa nsakuya na kumusangula.” Amena. Kechi, “Amiwa—Amiwa nsakweseka.” “Amiwa nsakuuba.” Kafwako kyabula kuyukanyikwa ne. Ajo kechi jajinga jiji jabula kuyukanyikwa ne, byo Aambile mba, “Amiwa nkoba. Amiwa nkoba.”

208 Kabiji yeka Umo ye waambile mba, “Amiwa nkoba,” ne mushila mulaye. Aleluya! Oo, ami! Amena.

“Amiwa nsakuya na ku musangula.”

209 Ne jikwabo Aye waambile mba, “Onaunai yuwe tepo, kabiji Nsakumona kyo Nakonsha kuuba pa kikye”? “Obewa ukonauna yuwe tepo, kabiji Amiwa nkamutungu jibiji mu moba asatu.” Kafwako kyabula kuyukanyikwa ne. “Pano Nsakweseka. Anweba bonse mwakonsha kwimana ne kumona kana Nakonsha

kwikyuba nangwa ine”? Aa, ine. “Amiwa nkamutunga.” Kechi pajipo kyabula kuyukanyikwa ne. “Amiwa nkamutunga. Anweba—anweba monaunai; Amiwa nkamutunga.” Oo, ami!

²¹⁰ Kika? Aye wayukile mba Ye yewa Muntu, mu Kinembelo, awo Davida ye aambilepo. “Amiwa kechi kaleka mweo Wanji mu kalunga kabafu ne, nangwa Amiwa nkuleka Wami Wazhila Umo akamone bubole ne.” Kabiji Aye wayukile mba Wajingamo monka mu mulaye wa Kyanembwa, nanchi onkao mambo Aye wajinga na bukishika.

²¹¹ Pano, bushe kuuba twaikala nayoyo ngyalutwe nenyi? Atweba twamutola Aye kwikala, kyakumwenako, bintu bikwabo. Kikulutu Kyambo kya Lesa wikyambile, kechi twakonsha kushiniinwa na Kyambo byonka Aye byo ajinga nakyoy?

²¹² “Amiwa ne lusanguko ne Bumi.” “Amiwa nkamusangula jibiji.” Amena. Kika? Aye wayukile mba Kyambo kyaambile pakyokyo, kabiji waketekejile Aye amba ukeya.

²¹³ Inge Amiwa ne yewa muntu uji mu Yoano 5:24, “Aye umvwa Kyambo Kyami ne kumwitabila Aye Wantuma, uji na Bumi bwa myaka, kabiji Amiwa kamusangula jibiji mujuba jikapelako. Aye kechi ukeya mu Kinje ne; wapitaila kufuma kulufu kuya ku Bumi.” Ao ye—Ao ye atweba. Pano twachinaka? Lukatazho lo lwepi?

²¹⁴ Ng’anyi lupusano lujipo nangwa umvwale bya musango ka? Witela obewa mwine *bibye*, *byobya*, nangwa *kikwabo*. Atweba twi baana bakwa Lesa, monka mu bupe bwa Lesa. Twayuzhiwa na Mupashi Wazhila, monka mu lusa lwa Lesa. Ng’anyi lupusano lujipo umvwe *yuwe* ye *yewa* nangwa *yewa*, inge aye ye Presbyterian, Methodist, Baptist? Inge wayulwa na Mupashi Wazhila, aye uji na Bumi bwalusanguko mwi aye. Amena. Ee. Pano, pa Juba ja Pentekositi. . .

²¹⁵ Yesu wibambijile, mu Luka 24:49, “Talai, Amiwa nkemutumina mulaye.” Kechi mba, “Nafwainwa kwikyuba. Nsakumona kyo Nakonsha kuuba pa kikye.” “Amiwa nkatuma mulaye wa Ba Taata pe anweba. Pano yainga konka ku muzhi wa Yelusalema na kupembelela poso mu kayulwe na bulume.”

²¹⁶ Pano, ibyepi umvwe bapembelela kimye kyabaya, kwamba mba, oo, moba sikisi, baamba mba, “Kika kyo tubena kupembelela? Naketekela mba twafwainwa kwikiswa kupichila mu lwitabilo. Kechi mwalanguluka byobyo nenyi?”

²¹⁷ Pano ibyepi inge Yakoba waambile mba, pa—pa juba jabutanu na buna, waambile mba, “Shimona, iya kuno pa mineti umotu. Mwayukatu, juba jikwabo Najinga na ng’umvwino yapusanako. Mwamona? Kabiji mwayuka kyo Naketekela nyi? Na—Na—Naketekela mba Aye kechi ukeba atweba kupembelela muno ne. Naketekela mba tuji—tuji naji kala. Kechi mwalanguluka byobyo nenyi? Twayai tutwajijile na

mingilo yetu. Twayai tutwajijile na mwingilo wetu”? Oo, kechi kikobiwa ne.

218 Kika? Abo bayukile mba ngauzhi wikyambile. Pano telekai. Aye ngauzhi waambile mba, “Kisopelo kyafwainwa kwikala pa kisopelo, ndonda yafwainwa kwikala pa ndonda, pa ndonda; papo pacheche kabiji popa pacheche.” “Kwachijijilai ku kyokya kyawama.” “Kabiji Amiwa nkamba ku baabo bantu na kikukuma ne na jimi ingi. Kabiji akwe ko kukokoloka, sabando.” Abo bayukile mba kintu kimo kyafwainwa kubiwa umvwe Waiya.

219 “Amiwa nketulwila Mupashi Wami mu juba japelako.” Yowela 2:28, “Kikeya kufikizhiwa mu moba akapelako, byaamba Lesa, Amiwa nketulwila Mupashi Wami pa bantu bonse, kabiji baana benu babalume ne babakazhi bakaulanga. Pa bakalume Bami babalume ne babakazhi Amiwa nkebetulwila Mupashi Wami, mu joja juba. Nkamwasha biyukilo mwiulu ne—ne panshi yantanda, ne mujilo, ne bwishi, kabiji ne luya.”

220 Abo bayukile mba kwafwainwa kwikala byakupitamo pakwiya kwa Mupashi Wazhila. Abo kechi batolelenga mvumino yabula kuyukanyikwa ne. Pakuuba byo baumvwine mba kintu kimo kyaenda, kabiji bamwene bukamonyi bwa mu Baibolo kasa bubena kwenda nakyo, kechi kyajinga kyabula kuyukanyikwa ne. Monka mu mikwakwa mo bailenga. Ndekelaiko mambo. Oo, ami! Abo bajinga banshiniinwa mba Mupashi Wazhila.

221 Mwayuka byo bajinga bashininwa nyi? Poso, Petelo, awa mulongo wabula kufunda, wakilukijile pa kishiki nangwa pa kibokoshi, nangwa pantu pamo, ne kwamba mba, “Anweba shabalume ba mu Yudeya,” na kyaji kicheche kyalupuka nobe shikombwe. Aye waambile mba, “Anweba banabalume ba mu Yudeya, ne anweba mwikala mu Yelusalema! Najinga na moyo wa anweba, kimye kicheche kyapitapo; Amiwa kechi byonji ne, pano. Lekai kikye kiyukanyikwe kwi anweba, kabiji ne kuteleka ku byambo byami. Abo kechi bapendwa byo mubena kulanguluka anweba ne. Bino akye *kyo* Kyokya.” “Atweba *twaketekela* mba akye *kyo* Kyokya”? “Atweba *twaketekela* mba akye *kyo* Kyokya”? Aye waambile mba, “Akye *kyo* Kyokya kyaambile ngauzhi Yoela.” Aleluya! Kafwako kyabula kuyukanyikwa pa kyokyo ne. “Akye *kyo* kyokya Kyaambile ngauzhi Yoela.” Oo, ami!

222 Yesu waambile mba, mu Mako 16, wapaine mwingilo ku Kipwilo Kyanji, “Yainga panopantanda ponse, na kusapwila Mamboawama.” “Abye biyukilo kape byafwainwa; abyo bikoba, kimye kimo kimo, kapepo”? “Bikebalondela aba baitabila. Abye biyukilo bikebalondelanga baitabila. Mu Jizhina Jami bakapangilamo bademona. Bakamba na jimi ipya. Inge batola miloolo nangwa kutoma bifwana, kechi bikebabeleka ne. Inge bateteka maboko abo pa bakolwa, bakakosa.” Kechi

mba, “Kapepo.” “Abo bakoba. Abye biyukilo bikebalondelanga baitabila.”

223 Lekai ne kipwizhe pamo, mukwamba kikye, mulongo, nyenga, pa mamineti acheche alondelapo. Nekiketekela. Naketekela mba bintu byonse bikwabo, kintu kyonse kyapusanako na Kyokyo, kechi kiji bulongo ne. Naketekela, kiji kyonse kimeena Kyokya kikapona. Naketekela, Amiwa kechi natako muchima ne nangwa bakomyunizimu bekale bavule byepi, nangwa *bibye* bipamo bivule byepi ne *byobya* bipamo, ne mitanchi ya bipwilo kabiji ne Bwinaloma, kabiji ne bikwabo byonse, Bwinamerica ne bintu byonse kikapona.

224 Pakuuba mba Kyambo kikemana Peenape, mambo Ke Kyambo. Kabiji kasa kikyange kwikala Kyambo, kyafwainwa kwikala ke mulanguluko. Kabiji kyambo ke mulanguluko wasololwa. Kabiji Lesa, mu Peenape, kyaishile mu milanguluko Yanji. Aye wasolwele milanguluko Yanji. Kyaikala ke Kyambo, kabiji Kyambo kyafwainwa kusololwa.

225 Ao oene mambo, byo Aambile pe Mesiyasa, kwafwajilwe kwiya Mesiyasa. Aye waambile mba kukekala Kipwilo mu moba akumpelo, kyabula jitomya nangwa mikonya ne; kukekala Kipwilo. Aleluya! Aye wikyambile. Amiwa natola Kyambo Kyanji. Nekiketekela.

226 Naketekela mba Aye walaile Mupashi Wazhila ku yense waitabila wakonsha kuketekela. Naketekela Petelo, pa Juba ja Pentekositi, byo asapwijile abwa busapwishi bwayukanyikwa, kabiji wibambijile mba lapilai ne kubatizhiwa, amba abye biyukilo bikeya, kabiji ne *bibye*. “Yense uketa pa Jizhina ja Nkambo ukapuluka.” Naketekela mba abo bo Bukine; baimene ponka. Amiwa ne kimona kumwekanyika.

227 Amiwa nayuka Mbena kulwa nakyo. Kabiji Nayuka mba Mbena kweseka kutapuka tampulo. Kasa kyangye Kutapuka tampulo, Nafwainwa kukasulula kyonse kyazhobakana, kichi kyamazhamatamba, ne byonse byashala, pakuuba mba kifume mujishinda. Pakuuba kimye kyonse kyo uba tampulo, ubena kuya kulutwe. Amena. Obenwa tolatu mupenyi ne kwikichibako.

228 Bavula ba mwianweba mwavuluka Paulo Rader, mulunda nami wawama bingi. Najingatu musapwishi nsongwalume, mwanyike. Nayanga ku Fort Wayne, na kuteleka kwi aye, ku Rediger Tabernacle. Mulongo mukatampe wabaya! Aye wakonsha kubwela kunyuma, wandosa toloshi wanji, wasutulako kuboko kwanji kabiji ne kubuluma kuchinyisha nobe mbeyala, kabiji Nalangulukanga mba wakonsha kutolokamo mu pulupiti. Inge wauba. . . Kabiji watatulanga na kibaba, ee, mu Ntendekelo, kabiji wapezhako mu Lumwekesho, kuya kunyuma ne kulutwe. Paulo wajinga mwanamulume bingi.

229 Pakwamba juba jimo, aye waambile mba, “Natemanga bichi mu Oregon,” ko afumanga. Waambile, “Juba jimo,

mwayukatu,” aye waambile mba, “Amiwa—Amiwa najinga mu mwingilo wa bumishonale, kwalepa kuntu kumo.” Nalubako pano kokyajinga. Kabiji waubilenga mwingilo wa mishonale.

²³⁰ Aye waketekejile mwi Lesa, waketekejile mu lubuko lwa Bulesa. Kabiji Paulo waambile mba, ponka pano paji kipwilo kya ntanda yonse leelo, aye waambile mba, “Inge Nakonsha kupotesha mbila yami ya bupe ku ba Pentekosito bakabane-kuchila, mukifulo kyakuuba byo Nauba kuno ne anweba jibumba,” waambile mba, “kabiji kyandetejile kusakamana, kyandetejile kufika pakifulo kya kongole ya madola masauzande ne masauzande. Amiwa naikala na kijikila poso Naikala na kaasa, kabiji pano nkefwe. Inge Nakonsha kupotesha mbila ya bupe ku ba Pentekosito bakabane-kuchila, Lesa inge wampesheshe kyabaya bingi pa kikye.” Kiji bulongo.

²³¹ Aye waambile mba wajinga momwa mu—mu masaka, kabiji watambwile kikola kya mashika nangwa kintutu kikwabo. Kyajinga kyakatazha. Kabiji wajinga monka mwine mu masaka, kabiji ke muntu waketekela mu lubuko lwa Bulesa. Kabiji aye waambile mba misongo yaijilengakotu palutwe. Aye walomba, walomba. Kabiji bamo bamishonali baambile mba bakasendatu bwato ne kuya na kusenda dokotala. Kika, kyafwainwa kwibasendela moba pakuuba mba bakasende dokotala. Kabiji waambile mba, “Ami—Ami...Kuuba kyokyo ne. Anweba kilekaitu bunke.” Waambile mba, “Inge Lesa kechi wakonsha kumbuka ne, nanchi Amiwa mbena kwiya ku Nzubo.”

²³² Nanchi waambile mba mukazhi wanji waikela mu lumu nanji. Kyatwajijiletu na kufita na kufita. Kabiji waambile mba wamwichile mukazhi wanji, ne kwamba mba, “Mutemwe, tolai kuboko kwami.” Waambile mba, “Twajijilatu na kundombelela. Pabena kuya nakufita pa kino kimye.” Waambile mba, “Na—Naketekela bivule bibena kuponena na kuzhokoloka.” Aye waambile mba, “Kwachijilai...Kwataitu kuboko kwami ne kulomba, kimye kyo Mbena kufumapo.” Aye wipesheshe ayemwine, na kukumanya Lesa.

²³³ Aye waubiletu nobe waponena mutulo. Kabiji aye waambile mba walotele mba wabwela ku Oregon ne jikwabo, nobe mwanamulume mwanyike, na kuchibaula bichi. Kabiji waambile mba mukulumpe wa kambi waambile mba, “Paulo, yanga kukwe ku lubaji lumo lwa katumba, kabiji kwaponene kichi kimo, kya kipimo kimo.”

²³⁴ Aye waambile mba wanyemene kukajila katumba na mikupa ya buyufi bwanji, kabiji watemene kichi panshi, ne kwikikopaula, ne kutemamo katemo. Aye waambile mba akya kichi kya mulumba kyanekena, kabiji katwa, kabaya, katemo katwa-kubiji katwelele bulongo mu kichi kya mulumba. Kabiji waambile mba wikikwachile, walangulukile mba, “Kyawama, Amiwa nsakwikisenda mushi ya katumba.”

²³⁵ Wawama, mwanamulume wakosa, waambile mba, “Natemwanga kufunda kubika manungo ami pamo, ne kwimana na nyuma yami, lubaji lwabaisha lwa muntu.” Misunyi yanji yajinga munyuma yanji ne mapuzhi, nyuma ya maulu anji. Waambile mba, “Nakonsha kutola mwandalo mukatampe,” ne kumubika pa kipuzhi kyanji, waya ne kuya. Bino waambile mba, “Awa wajingatu mwandalo wafwainwa, bino,” waambile mba, “Amiwa ngubatu...” [Mulongo Branham wasukenya maikolofoni—Waku.] (Amiwa mundekeleko mambo.) Waambile mba, “Amiwa kechi nakonsha kwendesha awa mwandalo ne.” (Ndekelaiko mambo.)

²³⁶ Aye waambile mba, “Amiwa kechi nakonsha kwendesha yewa mwandalo ne.” Aye waambile mba, “Nalwishishe, kabiji Nalwishishe kabiji Naesekele kumushikula, kabiji kechi Nakonsheshe kwikyuba ne.” Aye waambile mba, “Amiwa naubile na bulume bwami bonse buji mwi amiwa.” Aye waambile mba, “Amiwa kechi nakonsha kwendesha yewa mwandalo ne.” Kabiji waambile mba, “Kyapelako, Naumwine kukata bingi, Naiketetu panshi ne kushakamina ku kichi kabiji natatula ne kwinshimuna masulwila. Najingatu wapwamo.”

²³⁷ Kabiji waambile mba, “Pakupitapo ka kime, Naumwine jiwi ja mukulumpe wami.” Bino waambile mba, “Jajinga jiwi jakila mukuwama Jonakyumvwapo kala.” Kabiji waambile mba, “Byo Naalulukile, jiwi jaambile kwi amiwa mba, ‘Paulo.’ Kabiji Naambile mba, ‘Ee, bakulumpe, kyokika?’ Waambile mba, ‘Kika kyo ubena kwikindosela?’” Aye waambile mba, “‘Kyawama, anweba mwakambizhizhe kwikileta pa kampu, kabiji Amiwa ne mpwishamo amiwa mwine, nakyo. Amiwa—Amiwa kechi nakonsha kwikyuba ne, bakulumpe.’ Aye waambile mba, ‘Paulo, kechi ubena kumona awa mukola wa meema ubena kupita *popa*?’ Waambile mba, ‘Ee.’ Amba, ‘Awa mukola wapita monka mu kampu. Kika kyo wabijila kwikitayatu mumeema, wabwela wakajilapo ne kwenda kufika ku kampu?’ Waambile mba, ‘Amiwa kechi nalangulukapo kyokyo ne.’”

²³⁸ Nanchi aye wamwalumwijiletu mu meema, watolokelapo, ne kwamba mba, “Oo, ami!” Aye watatwile kunsasa meema, ne kutolauka, ne kubijika, na jiwi jikatampe, byo apichilenga mu manyaki, ne kuya mwaya mukola, bintu byonse, kasa akajila pa yuwe mwandalo, na kuya, akwe nakubijika, “Amiwa nakajilapo! Kasa nakajilapo!”

²³⁹ Aye waambile mba, kintu kitanshi, wabwelele mubututulu bwanji, kasa aji pakachi ka kibamba, kabiji ne mukazhi wanji nanji na kubijika. Aye wakonsheshe kubijika, “Amiwa nakajila pe akyo! Amiwa nakajila pe akyo! Amiwa nakajila pe akyo!” Balongo!

Byaalo bibena kwabana, Isalela ubena kubuuka,

Biyukilo Baibolo byo aambijile jimo;
Moba aba ngentila abalwa, moba abalwa kala;
“Bwelai, Anweba basulwa, kuba kweenu.”

²⁴⁰ Aye Mbila ya Kyambo kya Lesa ke Bukine. Bumi nangwa kufwa, Amiwa nakajila Ponka. Amiwa kechi. . . Amiwa kechi mbena Kwikyendeleka Akyo ne. Amiwa kechi mbena kweseka kwikyendeleka pa Kikye ne. Amiwa ne Kisendatu, kabiji Amiwa nakajilatu Peakyo. Lekai bakajimbulushi bemane. Amiwa kaloza laifo uji yense. Amiwa mbena kwiya mu kampu, juba jimo jibena kwiya, kasa nakajila pa Kyambo kya kwa Lesa. Amena. Amiwa nashininwa kufika konka.

Twayai tulombe.

²⁴¹ Kika kyo wafwainwa kwituntula na kipe kyobe kya bubi? Kika kya kwikela mu musango ye ujimo, kechi wayuka po waimana ne, kunyema kufuma ku kipwilo kimo kuya ku kifulo kikwabo, kabiji kufuma ku kifulo kimo kuya ku kifulo kikwabo? Kika kyakubujila kwibulamika, pa musalabu, bufuku buno, kabiji ne kukajila pa Kyambo? Kika kyakubujila kutola mulaye wa Lesa bufuku buno ne kukajilapo kufuma mu ndochi, ne kuya mu bbulu mukatampe, washikuka byobya? Kechi kulwisha Nakyo ne. Kechi musakamane Nakyo ne. Anweba Kiketekelaitu, Kiswai. Ke Bufumu bo bakonsha kubula kwendesha ne. Kajilai Ponka.

²⁴² Inge wakolwa bufuku buno, tolai mulaye wakwa Lesa, “Amiwa ne Yehoba ubuka bikola byenu byonse.”

²⁴³ “Amiwa Nakonsha kwikala bulongo byepi, Mulongo Branham? Aye dokotala waamba mba Njina lukatazho lwa muchima, Njina kaasa, Njina *kikye, kyokya*,” monse mokyaikela, “Amiwa nashika matwi, kamama. Amiwa ne mpofu,” kiji kyonse. Lupusanoka lwakonsha kwikalapo? Anweba nswai mulaye wakwa Lesa ne kukajila ponka.

²⁴⁴ Twayai tutole mukombo mukatampe, ne kumutwala monka mwa, ne kunemba peulu panji, “Milombelo ya lwitabilo yalombelwa bufuku buno; Amiwa nakajila ponka. Aye Baibolo waamba mba, ‘Milombelo ya lwitabilo ikapulusha wakolwa, kabiji Lesa ukamubushapo. Inge aye waubile bubi, bukamulekelwa.’ Amiwa nakajila ponka. Nekiketekela.”

²⁴⁵ Inge wauba kyatama, inge waya mungi bufuku buno, “Aye umvweta bubi bwanji kechi ukashukwa ne. Pakuuba aye wisolola bubi bwanji ukobilwa lusa.” Kika kyakubujila kwibusolola?

“Kyawama, kika kyo Nakonsha kuuba, Mulongo Branham?”

²⁴⁶ Busololai, kabiji ne kukajilapo. Lesa ye waambile byobyoy. Kikakufumya ku bubi boobe bonse.

²⁴⁷ Bushe ao muntu moaji bufuku buno, wakibula kubika luketekelo lwanji mwi Lesa pa lupulukilo lwa mweo wemu,

kabiji wafwainwa kutemwa kuvulukwa mu milombelo byo tubena kushika? Wakonsha kusutulako kuboko kobe, ne kwamba mba, “Ndombeshepo, Mulongo Branham. Nakeba kubikapo kijikila kya muchima wami.” Lesa akupeshe. Lesa akupeshe. “Nakeba kutaya...” Lesa akupeshe, maama. “Nakeba kutaya kijikila kyami.” Lesa akupeshe, mulongo. Lesa emupeshe kunyuma koko, mwane. Lesa emupeshe, inetu wakyanyike. Kijitu bulongo. Abyo ibyo. Lesa ekupeshe. “Nakeba kutaya kijikila kyami pe Aye kabiji ne kukajila pa mulaye Wanji ponka pano. Naketekela mba Aye walaile, ‘Aye ukeya kwi Amiwa, Amiwa kechi kamukana ne.’”

248 “Kechi byo Mbena kwiumvwa ne, ‘Nalombelejilwe bufuku bwapita, Mulongo Branham; Amiwa kechi naumvwapo buwame ne.’” Akyo kechi kijipo na kintu kimo kyakuba nakyo ne. Amiwa kechi nakajila pa byakumvwa ku mubiji ne. Amiwa nakajila pa Kyambo Kyanji. Ke mulaye Wanji.

249 “Mulongo Branham, Nafika ku kitapisho, foolo nangwa bimye faivi, nakweseka kutambula Mupashi Wazhila. Amiwa kechi Namutambula ne.”

250 Akyo kechi kyalumbululapo kintu kimo ne. Ikalatu ponka pa mwandalo, ukakuleta ponka pa kampu, mu kampu wa Mubeji, mu kampu wa bazhijikwa. Obewa ukafika konka. Ikalaitu pa mwandalo obe, ne kubijika kabiji ne kutota mitotelo ya Lesa nangovu yonse. Ajo jo jishinda ja kwikyubilamo.

251 Kimye kyo twakunyika mitwe yetu, bushe kine mwakeba kukajila ponka? Nanchi, akya kintu kicheche kibena kubekauka pa muchima obe, wakonsha kukeba kwiya kuno ne kwimana ku kitapisho pa kakimye kacheche kabiji ne kuleka tulombe ne kubika maboko pe obewa? Twafwainwa kwikala na lusekelo pa kwiya.

252 Twayai tusende kyokyo kintu kimo kicheche akyo kiji ku muchima wenu bufuku buno, ne kwamba mba, “Mwayuka mba, mwaya mungi. Pano sutulai kuboko kwenu.” Kijitu bulongo.

253 Obewa wajikutolokela pa mwandalo, mwandalo wa mulaye Wanji; kichi, musalabu wachibilwe. Bikai maboko enu kuzhokoloka yuwe musalabu pano. Enda kuya konka kuno ne kwamba mba, “Pano Amiwa mbena kukajila ponka. Ponka pano Amiwa mbena kwikiketekela. Amiwa mbena kwikiswa. Nekiketekela. Amiwa kechi kaluka ne. Amiwa nsakwikala nakyo akya Kyambo, poso awa waikala washinikishiwa. Kabiji panyuma umo washinikishiwa, Amiwa nsakuya konka na kutola mukwabo, kabiji ne kutatula kukajila ponka.” Mwamona?

254 Kabiji kyambo pa kyambo, tampulo pa tampulo, ukatambula bintu byonse Lesa byo alaile. “Mambo bintu byonse byakonsheka kubiwa,” kwi yewa wakajila ponka. Kajilai pa mulaye Wanji, mambo kine wafwainwa kukuleta ku kampu. Kyakonsha kukuleta ku Kyeenyi kya Lesa.

²⁵⁵ Mwakonsha kwiya kimye kyo twakunyika mitwe yetu? Kabiji naipuzha uji yense wakonsha kwimana pa kitapisho, pa kakimye kacheche tulombe.

²⁵⁶ “Amiwa nakajila ponka, Nkambo. Nkambo, Naketekela. Luzhinauko lwami lonse lwazhikwa mu nsulo. Nkambo, Amiwa mbena kwiya. Nekiketekela. Amiwa nakajila ponka pa Kyambo bufuku buno, kabiji Amiwa nsakwikiketekela na muchima wami yense. Amiwa ne musenda Anweba pa Kyambo Kyenu.”

²⁵⁷ Umo mwanamukazhi wawama waimana pa kitapisho, na—nakushinikisha kwi Lesa amba wajikushininwa. Kechi mwakonsha kwiya ne, anweba mwajikukunyika mitwe yenu, kabiji ne maboko enu asutulwa peulu, kabiji mwakukebanga kuvulukwa mu milombelo? Mwakonsha kwenda kwiya kuno nyi? Lesa emupeshe. Iyaitu kuno. Abyo byokiji. Iyaitu mwimane kuno. Ne kwaamba mba, “Amiwa nsakukajila ponka. Lesa, Anweba mwalaile, kintu kimo kyakokosha pa muchima wami, kabiji Amiwa naiya nakukajila ponka. Kabiji Amiwa nsakukajila ponka poso kifikizhe pa kampu. Amiwa mbena kwiya kufika ku kampu wa bazhjikwa ba Mwine Wakila.” Lesa emupeshe. Akyo kyawama. Iyai ponkapano, anweba mwakeba kukajila ponka. Monka mo waikela, “Nobe byonka Byonji, kwakubula ne kusashijila ne.”

²⁵⁸ Vulukai. Mwaamba mba, “Bushe akya kichi nyi?” Ee. Kwajinga kichi kyachibilwe panshi, kimye kimo, kabiji kyaimikilwe jibiji pa Kalvali. Anweba kajilaitu pa kyokya kichi bufuku buno, na milaye yakwa Lesa, akya Kyambo kyakobamine pakichi.

²⁵⁹ Amiwa nakajila ponka. Amiwa nsakwikiketekela, na muchima wami yense. Nasaka kuuba kyakonsa pa kwiya kuno ne kwimuna maboko abalunda nami.

²⁶⁰ Lesa emupeshe, pa kwimana kwenu kwakonsa. Nasaka namba anweba mwikale kuno, pa kakimye kacheche, mu kimye kyo tubena kulomba. Lesa akupeshe, mulongo wami. Nyenga yami wawama, Lesa akupeshe. Aye Nkambo Yesu...?. . . Lesa akupeshe, mulongo wami. Lesa akupeshe, nyenga. “Ntangijilai.” Tangijilai kubushiya bwa mukola.

²⁶¹ Vulukai, nobe kalume wakwa Kilishitu, Amiwa njina mwingilo wakusapwila kwa Kyambo. Amiwa njina mwingilo wa lushimuno wami. Kabiji Nakonsha kwimana pano bufuku buno. . .

²⁶² Kabiji mwanamulume wa myaka fifite-faivi, nangwa myaka fifite-fili, ukekala na myaka fifite-foolo mu Mulombola, kabiji waimana kuno ne kuyuka kyokyo, ne kikye kimwesho kyapelako, kyakonsha kwikala moba ami acheche a panopantanda. Na—Nakonsha kwimusha mu moba achechetu. Amiwa kechi nayuka byo kyalumbulula ne. Telekaitu ku tepu ne kwikala na milanguluko yenu anweba bene. Amiwa kechi nayuka

byo kyalumbulula ne. Bushe Nakonsha kwimana kuno, ne kuketekela lubaji lumu amba mambila ami o Mbena kusapwila o apelako, monka muno mu Phoenix, kabiji ne kwamba kintu kimo kyatama, kabiji nayuka mba ko mbena kuya kuji kuluwe, kabiji Amiwa kapingulwa na byambo byami byonka?

²⁶³ Balongo bami, lekai ng'ambe kikye kwi anweba, kabiji ne banyenga yami. Anweba mwatanwamo mu mbung'eno. Mwayuka kine kintu, kuyuka bapashi ne bintu. Bushe Naambapo kiji kyonse kwi anweba, mu Jizhina ja Nkambo, kanatu kyafikizhiwa? Amiwa nsakwipuzha uji yense. Ine, mwane. Kuzhokoloka ntanda yonse, kabiji ne biumbi bya bimwesho, kechi kwakikalapo ne. Kabiji Amiwa ne mubuula bukine bufuku buno, Mashi akwa Yesu avula bingi kyakuuba mba akonsha kufuta bubi bonse, kabiji akonsha.

Kuji Nsulo yayulwa na Mashi, (Kabiji waimana
Ponka pano.)
Kufuma mu mishipeshipe yakwa Emanuele,
(Kyo kyonka kine kintu kyashalako
pantanda.)
Babi bakowamo,
Bubi bwabo bonse bukapwa.

²⁶⁴ Amiwa mbena kwipuzha babo bamingilo ponka pano, ne balongo, inge mwakonsha kwiya kuno mukachi ka babo bantu. Yense uji... Bushe ajo jojishinda, ja kwichilamo bamwingilo amba balombe na bantu? Bonse bamwingilo muno, nanchi, aba bakeba, baji nalusekelo kumona myeo kupuluka, iyai kuno ne kwimana nobe jibumba jambilombelo, ako ko twakonsha kwikashila pamo atweba bene, tufume ku bintu biji byonse, ne kwabana atweba bene. Abo banabalume ne banabakazhi babena kubika katetesho pa lwendo lwabo, bufuku buno, na Mashi akwa Yesu Kilishitu, na kumusenda Aye pa Kyambo Kyanji, ne kukajila kufika mu Kyeenyi Kyanji, pa Kyambo Kyanji, ne kwamba mba, "Amiwa Bano, Nkambo. Amiwa kechi njipo na kintu kyakupana ne kanatu amiwa mwine, kabiji ntolai amiwa." Mwakonsha kwiya na kwimana nabo, inge mwakonsha? Yense wakonsha kukeba, iyai ne kwimana. Lesa emupeshe, balongo bami. Akyo kyakila mu kuwama. Amiwa natemwa kumona bantu baimana kyakonsa, abo bata muchima ku myeo. Naketekela mba, balongo bami, akyo kyawama. Bwelaitu lunyuma. Akyo kyawama. Imanaitu pamo. Twayai ponka pano...

²⁶⁵ Inge ujizha piyano atatule kwimba, inge wakonsha, twayai twimbe yuwe lwimbo, bitende bitende pano, bulongo, na munema.

²⁶⁶ Atweba kechi tubena kwiya ku kintu kyabubela ne. Atweba kechi tubena kwiya ku kintu kimo akyo kiji—kiji—kiji na bukitabila-mbijinga ne. Pakuuba tubena kwiya mu Kyeenyi

kya Lesa, aye Yehoba Lesa wabulume bonse, Ao walayile, amba, “Pose paji babiji nangwa basatu bapwila mu Jizhina Jami, Amiwa nji mukachi kabo.” Ambai kwi Aye nobe byo wafwainwa ku mulunda nobe, amba, “Nkambo, Mundekeleko mambo. Nalenga mambo.” Kabiji tusa kwimba.

Kuji Nsulo yayulwa na Mashi,
Kufuma mu mishipeshipe yakwa Emanuele,
Amo babi Bakowamo,
Bubi bwabo bonse bukapwa.

Awa kapondo wasekejile pa kumona
Aya Nsulo mu juba janji;
Amiwa ne Wa, bubu bwine,
Omwai bubu bwami bonse.

Byo Namwene aa Mashi konka ku lwitabilo
Mashi enu aichikile,
Butemwe bwakunkula bwaikala ke kikomo
kyami,
Kabiji bukekala poso Nafwa.

²⁶⁷ Pano ikalaitu nzoo pacheche. Kafwako byo muji ne. Kafwako nangwa umo mwi atweba ne. Kabiji pano ikalaitu na bukishika, na michima yenu yonse, kunyikai michima yenu ne mitwe, konse konse, mu kishimikwa.

²⁶⁸ Taata Wetu Wamwiulu, Nayuka mba Byambo Byenu byakine. Abyo kechi byakonsha kukakalwa ne. Abyo ke Kyambo kya Lesa. Abyo ke Lesa. Kabiji Anweba mwaambile mba, “Aye wiya kwi Amiwa, Amiwa kechi kamukana ne.” Kabiji baabo banabalume ne banabakazhi, bashininwa, byo twayuka mba kechi baji bulongo ne, baenda kuya kulutwe, bufuku bunu, Nkambo, na kwisolola amba baya mungi, byo twayuka mba batangijilwa na bumuntu bwamukachi bwa—bwajikwibabula mba beye ku Nsulo. Kabiji baimana kuno, na mitwe ya kunama ne michima, na kutoma Meema a Bumi, kyatutu, akyo kyalailwa kwi Lesa. Batambulai, Taata, mu Bufumu Bwenu. Abo ke Benu.

²⁶⁹ Anweba mwaambile mba, “Kafwako muntu nangwa umo wiya kwi Amiwa ne kanatu Ba Taata bamukoka patanshi. Kabiji bonse bobapa kwiba Taata bakeya kwi Amiwa.” Kabiji kimweshwa mba Lesa wapana baabo kwi Kilishitu, ke kya bupe kya butemwe. Kabiji papo baimana, Nkambo. “Kafwako muntu nangwa umo wakonsha kwibafumyamo mu kuboko Kwami ne.” Kabiji Nalomba, Lesa, amba Anweba musakwibakizha bufuku bunu, nobe byo baimana papo, kabiji bapai lubatizhilo lwa Mupashi Wazhila mu kimye kyo baji kuno ku kitapisho.

²⁷⁰ Lekai bulume bukatampe bwa Kilishitu buyuzhiwe mu bumi bwabo ponkapano! Abo besolola kala. Abo baiya kulutwe. Anweba mwaambile mba, “Aye ukasolola Amiwa kumeso a bantu, aye Kamusolola kumeso a Ba Taata ne Bamalaika bazhila.” Twayuka mba mwingilo waingijiwa.

271 Pano, Nkambo, babikai mu katetesho kamulaye wa Bufumu, wa Mupashi Wazhila. Kiswishai kye, Nkambo. Itulwilai Mupashi Wenu pe abo, ne kwibayuzha na Mupashi wa Lesa mumi, pakuuba mba bakekala ke lushimuno lwa bumi moba onse a bumi bwabo, kufika ne ku Bufumu bwa Lesa.

272 Pano lekai jibumba jimane. Bonsetu ikalai mu milombelo. Atweba ntusa kulomba mba abo. . .

273 Pano, anweba bonse mwaiya kuno bufuku buno, mwaumvwa mba anweba mwajinga na bubu mu muchima wenu, pano kafwako nangwa kimo kyo mwakonsha kuuba ne kanatu kwitabila kyokyo. Aye Wazhila. . . Anweba itabai *Kikye* konka ku lwitabilo. Alwe ke lwitabilo, lwa kwamba mba mbitabe. Yesu waambile mba, “Kafwako muntu nangwa umo wakonsha kwiya kwi Amiwa ne kanatu Ba Taata bamukoka patanshi. Kabiji bonse beya kwi Amiwa,” Aye ukebatambula. Aye kechi wakonsha kuuba kintu kikwabo ne, mambo Aye wikilaile. Mwamona? Kechi mukokolokele pa byakumvwa ku mubiji ne. Kokolokelai ponka pa Kyambo Kyanji. Mwamona? Akyo Kyambo byo kyaamba.

274 “Aye umvwa Byambo Byami ne kumwitabila Aye watuma Ami, uji na,” kintu kijipo, “Bumi bwa myaka, kabiji kechi ukeya mu Kinje ne, pakuuba wapitaila kufuma kulufu kuya ku Bumi.” Aye Mupashi Wazhila ke kyakupitamo kyakuyulwa ne kuvwikwa na bulume bwa kwingila mwingilo. Pakuuba kwisolola ne kutambula Kilishitu ke kwikala na lwitabilo kabiji ne kwisolola nkobe, kabiji ikalai bakasuluka amba Lesa wimulekela mambo enu.

275 Kabiji monka mwaila Kyambo Kyanji, Aye waambile mba, “Kafwako muntu nangwa umo wakonsha kwiya ne kanatu Ba Taata bamukoka patanshi.” Mwamona? Pano, Lesa wimukoka, patanshi. “Kabiji aye ukeya kwi Amiwa, Amiwa kechi kamutaya ne.” Mwamona? Mwamona? Anweba—anweba mwatambula. Kintutu kimo, anweba muji na. . .

276 Aye—Aye wakufwijile. Bubi bwenu bwalekejilwe, myaka naitiini aduleendi yapitapo. Anweba iyaitu pano na kutambula akya kyo Emubijile. Mwamona? Kabiji mwaketekela mba Aye wafwijile bubu bwenu? Anweba mwakonsha ku mbitaba Aye kwikala mfuto yamambo enu nyi? Mu byambo bikwabo, anweba mutambulai Aye, byo Asendele bubu bwenu.

277 Mwakonsha kusekela ne kumusachila Aye pa kusenda bubu bwenu? Mwaketekela mba Aye wikyubile nyi? Pano sutulaikotu kuboko kwenu, ne kwamba mba, “Naketekela mba Aye wasenda bubu bwami,” amena, “wasenda bubu bwami.” Kijitu bulongo.

278 Pano, obewa wafikilamo kutambula lubatizhilo lwa Mupashi Wazhila.

279 Inge kechi mwatambula lubatizhilo lwa Bwinakilishitu ne, umo wa baabo banabalume muno basakumona mba, mwatambula lubatizhilo lwa Bwinakilishitu.

280 Bino pano, “Petelo byo akyambilenga bibye byambo,” kasa bakyangye kubatizhiwa ne, “kimye Petelo kyo akyambilenga bibye byambo, Mupashi Wazhila wibaponejile.” Kika? Bonse bajingatu babena kuketekela. Pano obewa ubena kuketekelatu. Mubena kukeba Kintu kimo pano akyo—akyo kikemutwezha mu katetesho ka mu Bufumu bwa Lesa, Kintu kimo kikekala kyakine kwi obewa. Mubena kukeba ku-...Kechi mubena kukeba kutambula Mupashi Wazhila ne, anweba bonse? Kechi mubena Kumukeba nenyi? Kine, mwamukeba. Abo ke bulume bwenu bwakwimulama. Mwamona?


Bapwijile pamo pa nzubo ya peulu,
Na kulomba mu Jizhina Janji, aye...
Babatizhiwe na Mupashi Wazhila,
Kabiji ne bulume bwakwingila bwaishile.

281 Mwamona? Oo, akyo kyo mubena kukeba pano. Kabiji mwakonsha kwikala nakyo, ponka pano. Ke kyenu, ponka pano.

282 Pano, balongo, iyai. Twayai, muntu yense pano, ne kubika maboko etu pa baabo balongo, ne kulomba mba batambule Mupashi Wazhila. Endai kwiya, balongo. Endai kwiya.

283 Pano, kipwilo kyonse, sutulaiko maboko enu, muntu yense!...?...?

284 Taata Wetu Wamwiulu, mu Jizhina ja Nkambo Yesu Kilishitu, yuzhai muchima yense muno na lubatizhilo lwa Mupashi Wazhila.

285 Tambulai Mupashi Wazhila. Tambulai Mupashi Wazhila, aabo bantu muno baimana ne kupembelela Kyeenyi ne bulume bwa Lesa buyuzhe mu bumi bwabo. 

63-0114 Ntolompita Ipana Mvumino Yabula Kuyukanyikwa
Christian Assembly
Phoenix, Arizona U.S.A.

KAONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org